


BAHIBURI, UNTU GWĀKWÁNDÁ

 Kangi ukupa i—i linini...Une ngwinogona kikayapo nakimo ikinunupo, kwa une, ukukĩnda itolo i Lisyu. “Ulwítiko lukwĩsa nu kupilika, kangi ukupilika i Lisyu lya Kyála.”

² Pa Fitatu, kangi lumo Pamilungu, lumo mwa ngomano sya Pandungu, ukumpa untimi itolo ubutusyo panini, iki umwēne ikulōndigwa fiyo ubwa ubwēne, kangi twālinogwīne lumo uswe itolo tubagīle ukwēga u Būku mu i Bāngéli. Uswe twālisibīle ukubōmba ikyo, kangi utubalilo tumo ukuya pa kyēne ikyīnja kyōsa.

³ Une ngukūmbukila akabalilo kamo uswe twālitūgēsye ikyīnja kyōsa pa Būku gwa Busetuli. Lōli, o, mwe, ifīndu ifi uswe twāmanyīle, kangi mūmo kyāyīlīle ubununu ikyēne! Polelo uswe tusulukege nukwakwēga u Buku gwa Daniel, pamo Buku gwa Bwandilo, pamo Ukusoka, kangi itolo ukwēga ilyēne, untu ukufuma pa ntu, kangi ikyēne kukupinya i Bāngéli lyōsa palikimo. O, une ngikagana itolo ikyo!

⁴ Ukufuma apa panini, uswe twisakwēgága i...Linga u Ntwa ikukīndilīla ukusaya kangi uswe tukukīndilīlága, uswe twisakwisaga mu findu fimo ifisolofu naloliloli muno, naloliloli fisolofu. Kangi uswe tukubukaga ukufuma pa buyo ukubuka ku buyo ukwisila mu Lisimbo, ni kyēne.

⁵ Kangi une niganile ukutēdeka i Lisimbo likufwanikisania ni Lisimbo. Umo mo mūmo ikyēne kibagīle ukuya. Ikyēne kyo itolo kimokyēne ikipiicha ikikulumba ikinywamu ikimogi. Kangi mwa Būku uyu uyu uswe tukufūnda, uswe tukuyaga ukwingilamo, o, bupoki, kangi ububūbulúsyo Bwamwakyala, ni fika, ni fisa. Kangi, o, filifyosa fikwisa muno.

⁶ Kangi lumo akabalilo kāko une ngufika ku buyo kūko une ngufimbilisigwa ukuya ni ngomano. . . Une ndikumanyamo siku itolo mo ndili une nguyaga nu lukomano, ukukōlelīgwa ku lukomano, panongwa yakuti une ngaya nakyō kalikosa aka kabīkīgwe mpaka une itolo ngwipilika ukulōngosīgwa ukubōmba akandu kamo. Kangi ikyo kibagīle ukuya bo kukāli ndubunju, une mbagīle ukwenda pa ndēge ukubuka ku California, ukufyūka ku Maine pamo kubuyo bumo, itolo kūko Umwēne abagīle ukungōlelága une. Iyo yo nongwa une ndikubīka ulusanjo inywāmu, indali isya mabulēndo mma, panongwa yakuti une ngabagila ukubomba ikyo. Ubutumigwe bwāngu bukabūmbigwa mōsa bo ulu umma, kangi ubwēne bo itolo bukīndane.

⁷ Kangi lilino une ngwīsa ku kāya itolo ku butusyo ubunini. Une nāgāndīle ukusuluka amapaundi malongo mabili, mu

lukomano ulu lukĩndile. Kangi Nkundwe Mercier nu Nkundwe Goad ali apa, akabalilo kanini aka kakĩndile, kangi alinkuti, “Nkundwe Branham, une nguketesya iki ugwe kubomba. Ugwe kubika indumbula yako yosa pa kyēne.”

⁸ Une ndinkuti, “Iyo yo njila yēne ugwe ubagile ukubōmba uluko ulutalusye lwa mbombo ya Ntwa, ko kubika kilikyōsa ugwe uli nakyo kulakula ku nkyēne panongwa ya Kristi; amaka gāko gōsa, umoyo gwāko gōsa, indumbula yāko yōsa, ilinogono lyāko lyōsa, kilikyōsa iki ugwe uli nakyo.” Akabalilo kāko ugwe kubōmba kalikosa, bombāga ikyēne kanunu pamo komma ukubōmba ikyēne napanandi, muketile, kileka itolo kyēne. Linga ugwe kwisa ukuya Nkristi, bika kilikyosa iki ugwe uli nakyo kwa Kristi, ikyo kyo, kabalilo kāko, ulwēke lwāko, ikyāko kilikyōsa.

⁹ Une itolo nakētēsýága umwinitu unnini uyu. Uyo yo nkasi gwāko, Nkundwe Burns, bule, yula ukukiba nukwĩmba pala, undume-nu-nkĩkũlu abakeke bala. Kangi—kangi ikyēne kikaya piano, kangi ikyēne kikaya orogani, lōli ikyēne kyo luko lumo lwa kyōmbo, abēne bikutēndēko ukukuba ikyēne nukutita ikyēne, nukubōmba ikindukimo kwa Ntwa. Lumo umwe mubagile ukubōmba ikyo, nukwĩmba, uko ko, kukaba imyoyo. Bōmba ikindukimo, kisita kupāsyā. Linga ugwe—ugwe ubagile ukuba ulupufi, ena, pufya. Itolo bōmba ikindukimo. Itolo yobela pamo bōmba ikindukimo ku Kitangalala kya Kyāla. Kilikyōsa ugwe uli nakyo, kibika ikyēne ku bubōmbélo mu bubōmbélo bwa Kyāla.

¹⁰ Lilino, uswe tutikubūkága ukwitūgásya akabalilo akatali fiyo mma, panongwa yakuti une mmenye mukubōmba. Umwe mukufimbilisigwa ukusumuka ukwāndána. NKangi une ngubūka ku kufwima abalukoti ulubunju lulilosa. Une ngubabūlága umwe u bwanaloli. Ikyo kyo iki une ngubōmba. Ikyo kyo iki une nīsile kukāya, ko kutūsyā panini. Kangi popāpo une ngusumuka, kifuki isala ya buna kulubunju, kangi ngubūka panja mmatengele kangi, ena, ukufwima panini nukubūka ukugona utulo. Kangi une nāndile ukukaba bumo mwa busito bula kangi, popāpo une nguyapakutūsyā, ukufuma pa kabalilo, linga umwe . . . u Ntwa itikisyeye. Kangi filifyosa fili kanunu.

¹¹ Syosa silikanunu, lilino, uswe tukusanukaga mu i Bāngéli. Une ngulōnda umwe ukutwāla ama Bāngéli ikilo kili kyosa, ukuti umwe . . . mumo umwe mubagile. Linga yumo ikufumwa amanandi, abagile yumo ukulonda ukukōngēsya mula nu bubale, uswe tuli nago gamo apa, uswe tubagile ukuya ni . . . bamo mwa bāmbilila-bahesya ukuyabania agēne mōsa. Aligwesa ikulonda yumo? Ena, itolo fyusya ikiboko kyako.

¹² Nguswiga linga Nkundwe . . . Doc, ugweisa kuno nukwēga amaBāngéli aga. Ugwe gwīmīle kifuki kula, kangi Nkundwe Burns. Ngimba ikyo kitakusye, Burns? Une numpilike umwēne

ikuyoba...[Unkundwe ikuyoba, “Conrad.”—Nsimbi.] Fiki? [“Conrad.”] Conrad. Une nunkólíle umwène... Une ngufika luko lwa bukafu bwa kupilika, lumo, Nkundwe Neville. Ngimba une njágíle bulebule ingamu yila iya Burns? Une nkimenye ikisyo kya nnyāmbala yula, kangi une itolo ngabagíla, ngabagíle ukukóléla ingamu yāke.

13 Kangi umwe mumenye, bo ugwe kufika ukuya nkangale panini, une ngukyāgānia ikindu kimokyēne, ikyēne kikafu kuli une ukubala i Bāngéli ili. Kangi une itolo nkibēngíle ukwinogona ukuti kufīmbilisigwāga ukufwala amandalasi, ukuti ubale i Bāngéli.

14 Lōli, apa pakaya patali mma, une nālinogwíne une nayaga pakuya mfwamaso. Kangi une ndinkubūka kula ukwakwāgāna na Sam. Kangi Sam alinkuti, “Bill, une ngamanya.” Alinkuti, “Une itolo ngukwagilaga ugwe ululagano na yumo ungangwāmaso.”

15 Une ndinkubūka ku Louisville. Ubwēne bwabagíle ukuti bwāli bwígāne bwa Ntwa. Yumo umfumke ungangwa-gwamwaso; une ngwībwa ingamu yake lilino. Loli umwene ābalile buku gwāngu. Kangi umwene alinkuti, “Linga ugwe gwabukaga kangi ku Afrika, une ngulonda ukubuka na ugwe.” Umwēne alinkuti, “Kangi linga ugwe... Abāndu ba Afrika bala bakuganile ugwe.” Kangi alinkuti, “Abēne ba bānyihō fiyo, fiyofiyō nu mmāge, ukubūka ukutumula. Popāpo,” alinkuti, “Une ngulōnda ukupa imyesi mihano na gumo igya būmo bwāngu, panongwa ya bupānje bwa magengeremia mmaso ni findu, ku i... mu butumigwe.” Kangi alinkuti, “Linga uswe twābagíle ukubōmba palikimo, kangi ugwe gwābagíle ukukaba uluganilo lwa bēne, bo ulu,” alinkuti, “polelo linga abēne bāli na magengeremia kangi ni mbombo sya fisige,” alinkuti, “Une itolo angali nkiganile ukupa ikyēne, kyaitolo kisita kuhōmba, imyesi mihano na gumo gya ikyēne.” Kangi une ngwībwa ko kabalilo katali nki ugwe kufimbilisigwa ukugúlíla ukuya nu lulagilano nu mwēne.

16 Kangi uswe twālitūgésya nkyūmba ikinini kangi ikyēne kyāli nakyō akanini—akanini akalumuli akakesefu ukwāsya, kunyuma kula nkyūma ikyāngísi. Fiki, une nābagíle ukubala amasimbo. Ikyēne kilinkuti malongo-mabili-malongo-mabili. Une ndikubagíla ukubala ikyēne injila iyi na iyi. Kangi umwēne alinkukoma ikyēne pa kalongo na kihano-kaongo na kihano, kangi une ndinkubagíla ukubala ikyēne. Kangi ukubíka ikyēne pa kaongo-kalongo, kangi une ndinkubagíla ukubala ikyēne. Umwēne alinkuti, “Mulimosa, kikayapo kingi fiyo iki kitamisyē ni fisige fyāko.”

17 Popāpo umwēne āli nako aka teleskopu akanini. Umwēne alimkubíka akōmbo akanini kunyuma kula, akandu akanini, umwe mumenye. Gala agaiyolo amateleskopu, balinga bikukumbuka agēne siku? Uswe twālisibíle ukukētelamo agēne,

ukukēta amapiicha, itolo bo ulo. Kangi umwene alinkuti, “Ngimba ugwe ubagile ukubala ikyo?”

Une ndinkuti, “Ena, nkulumba.”

Umwene alinkuti, “Bala ikylene kwa une.”

¹⁸ Ikyēne kyāli ni, o, ikiyabo kyōsa, kifuki bo *ulo*. Une ndinkwānda, ukubala ikyēne; umwēne alinkwānda ukukikwābila ikyēne mmwanya, bo *ulo*, ukwisa ukuya nkololofu kangi nkololofu. Umwe alinkufika kifuko bo *ulu*, une ndikwīma. Umwēne alinkuti, “Une mbagile ukukubūla ugwe ikindu kimokyēne, ugwe ukīndile malongo mana.”

Une ndinkuti, “Ena, uko kutalusya, kubutali fiyo ngīndīle ukwēne.”

¹⁹ Umwene alinkuti, “Ngimba ugwe ubobile bulebulu ikylene?” Umwēne alinkuti, “Ikisige kya mūndu, nkipeligwa, akabalilo kāko ugwe kufika ku malongo mana mbukusi, ngati inywīli sikufika mbuha, na fyosa bo ifyo, umpila gwa kisige gukufika ukuya gwāngābya.” Alinkuti, “Lilino, linga ugwe kuya mūmi kubutali ukufwāna, ikyo kisakwisa ukugomokela kangi.” Umwēne alinkuti, “Ukukēta kwakibili kula, abēne bikukukōlēla ukwēne. Lōli,” alinkuti, “u mūndu, kifuki ifyīnja malongo mana mbukusi, abēne bisa fiyofiyo. . .” Alinkuti, “Kikayapo nakimo iki kitamisye ni fisige fyāko.”

²⁰ Une mbāgile—une mbāgile ukukēta ulunywīli linga ulwēne lwālambelele pa kipālo, ukusōkāpo ukufuma kwa une. Lōli fika kifuki kwa une. . . Kangi une ndikuti, “Lilino, ugwe kubala i Bāngéle,” alinkuti, “ugwe kuligutila ilyēne kubutali na ugwe.” Alinkuti, “Ukufuma pa kabalilo, ulukōngi lwāko lutisakuya lutali nukufwana mma, mpaka ugwe ukabagila—ukabagila ukukifikisya ikyēne kubutali kula ukuti ukikōle ikyēne.”

²¹ Kangi popāpo umwēne alīndēndike une amandalai, kangi pa kiyabo kya pāsi ugwe ubagile, ikyēne kyo kwa kubalila. Umwēne alinkuti, “Lilino, mu kigemo kyāké. . .” Umwēne alinkwinogona une nāli yumo gwa balūmbilili aba abayīndikīgwa, umwe mumenye. Kangi popāpo alinkuyoba ukuti i. . . ugwe. . . Ikiyabo kya pamwanya kyo itolo ndalasi lya madirisya, itolo indalasi lyapaliposa. Kangi ikiyabo kyāpāsi kili nu luko lumo lwa busyāno mu kyēne, iki une mbagile ukubala pabupipi, umwe mumenye, bo *ulo*. Popāpo une itolo ngabengile ukugafwāla agēne; une ngubōmba.

²² Kangi lilino, mu bmanyisi bwa i Bāngéli, kangi une ndinalo Ulwītikāno Ulupya ikilo iki. Popāpo ikyēne kyo. . . Une ndinalo Ulwītikāno Ulupya lwa Collins kangi ilyēne lili na masīmbo amanywamu-kanunu. Lōli lilino, akabalilo kāko une ngugomokela mu līngi limo, une—une lumo ngufīmbilisigwaga ukubūku ku binangu abaiyolo bala, kangi—kangi mu luko lumo ukubala ukwisila mu bēne. Lōli kilikyosa ikyēne kili, une—une ndi nsangalufu une ndinakyo ikindukimo une—une mbagile

ukubala pōpe. Kangi—kangi—kangi kilikyosa iki une ndinakyo, une ngubūkága ukupa aligwesa kilikyosa une mbagile, ku lwīmíko lwa Kyāla, ngusúbila ukuti Umwēne isakwēgága ikimanyilo kya bukāngále kila ukusōsyápo. Une ngabagila ukunsuma Umwēne ukusōsyápo ubukāngále. Une. . .Ena, ikyo kyo itolo kindu kimokyēne uswe tubagile ukubomba. Uswe tukufimbilisígwa ukukindamo mu kila. Kangi une mmenye une ngaya ndumiana nnini mūmo une nāyīlīle, nimege apa pa kigemo. Une ndi ni fyīnja malongo mana na lwēle mbukusi. Kangi itolo inogona, ifinja fibili ukongelelāpo, fisakuyaga fyīnja malongo mahano mbukusi, Nkundwe Mike.

²³ Mwe, ngabagila kifuki ukwitika ikyēne! Une itolo. . .Une ngāmēnyémo siku ukuti une nākīndīle malongo mabili mpaka kifuki fyīnja fibili ifi fikīndīle. Uko ko kutalusya. Uko ko kutalusya. Une itolo. . .Une ngābagile ukwītika ikyēne. Kangi pōpe une—une. . .Ikyēne kikafu kuli une ukwītika mpaka nākētīle mu ndalasi, kangi polelo une—une ngumanya ikyēne kili polelo. Lōli—lōli itolo ukukēta, une itolo ngwipilika itolo ukuya nnunu mūmo une nālipilikilémo siku mbumi bwāngu, kangi une ndigwakupālīsyā panongwa ya ikyo, kangi. Ulutufyo lōsa luyeye kwa Kyāla.

²⁴ Lilino, uswe tukufunda u Buku gwa Bahiburi. Ilyēne liyīle. . .O, ilyēne lyo limo mwa masolofu ukukīnda, amakabi aMabūku ga i Bāngéli. Une ngubabūla umwe, ilyēne lyo i Būku ili naloliloli lisaku. . .Linga Kyāla ikwitikisya, kangi uswe itolo tukufikaga pāsi mu iki, une ngwitika uswe twisakutwāgamo utunyāfu twagolidi mpaka uswe itolo twisakulāta indūfyi kwa Kyāla akabalilo kōsa. Kangi lilino une. . .

²⁵ Ili Būku lya Bahiburi, nalolilo iki Ilyēne lili, Ilyēne libagilīle ukuya lisīmbigwe na Mwikemo Pauli, unkulumba unkīnde unsetuli gwa i Bāngéli, une ngusakikisya, ikīsu kyalimo nagwe siku, panja pa gwītu Ntwa Yeso Kristi. Kangi Pauli āpāgulāga i. . .Lilino, Pauli āli gwanaloli mmanyisi gwa i Bāngéli; uko kokuti, u Lwitikano Ulupya. Ilyo lyo lyēne i Būku lyāsīmbigwe akabalilo kala, likukōlélígwa i Bāngéli. Kangi umwēne āgelāga ukunāngisya ku Bahiburi, ukupagulania u Lwītikáno Ulukūlu nukunāngisya u Lwītikáno Ulukūlu ukuya nsyūngūlu pamo ikwakwegelela kwa Ulupya.

²⁶ Palapala pala uswe tubagīle ukutika ulukīndi lwa kukāya nukwitūgāsyā imyēsi mitatu palapala pala pa līnogóno limolyēne lila, palapala pala. Ukubūka kulakula ukugōmokéla, linga uswe twābagīle ukusunukila mMabāngeli gītu lilino, mōmumo uswe tuli pa Bahiburi, unto gwa 1. Lōli linga uswe tukusanukila ku Busetuli, untu gwa 12, umwe mubagīle ukukibona ikyēne nubupelesya kangi, mūmo imisyūngulu. Linga. . .umwe mwe muli ni fisīmbito kangi mukuyaga pakusimba a Masimbo. Mwa Bahib-. . .

²⁷ Mu Busetuli 11, uswe tukusyāgānia ukuti Yohani, pa lusūngo lwa Patmos, ālīmbwēne unkikūlu imile mmwānya, kangi umwēne āli ni lisuba ku ntu gwāke kangi umwēsi pāsi pa njayo syāke. Kangi unkikūlu yula āli mbubabe, nu mwāna ukuti apāpīgwe. Umwēne alinkupāpa u mwāna unyāmbāla. Inyīfwīla ingesefu yilinkwīma, ukummōnanga umwāna yula akabalilo kāko umwēne ātīgi apāpīgwege. Kangi u—u mwāna alinkunyakilīgwa mMwanya, kangi unkikūlu alinkubopela ndulangalanga kūko umwēne āswiligwāga ku kabalilo, akabalilo, kangi sinda gwa kabalilo, pamo ukuyabania kwa kabalilo.

²⁸ Lilino, unkikūlu alimimilile ikipanga, kangi u Mwana yula āpāpīle ali yo Kristi. Umwēsi pāsi pa njayo syāke lwāli lulāgilo, kangi ilisuba ku ntu gwāke lyāli ipyāna. Indondwa kalongo na sibili syāli batumīgwa kalongo na babili. Kangi apa po pāla, ku iki. . . Abatūmīgwa kalongo na babili bāli lwīmīko pamo ukufwīkīgwa ingiga kwa Lwītikāno Ulupya. Muketile? “Kabuno nasimo inyālo isi sibagīle ukwālīgwa ukukīnda isi sitalīle syālīgwe.” Muketile? Ulwēne, u Lwālo, u—u Lwītikāno Ulupya, abatūmīgwa, i Kimanyisyo kya batūmīgwa, na fyosa bo ifyo, yo ngiga iyālwālo iya Lwītikāno Ulupya. Kangi polelo ku. . .

²⁹ Umwēsi go nsyūngūlu gwa lisuba. Ilisuba likundalika itolo ubwēlu bwāke akabalilo kāko ilyēne lili kunyuma ku kīsu. Kangi u mwēsi gukupa ubwēlu bwāke, ukwēndamo, pakilo. Kangi kyo kipiicha ikimogī bule uswe tulinakyo apa, ipiicha iyīngi immogi: ilisuba likwīmīlīla Kristi; u—u mwēsi gukwīmīlīla i Kipānga. Ifyēne fili itolo bo undume nu nkāsi. Kangi mukusitakuyapo kwa Kristi, i Kipānga kikundalika u Lumuli ulunini, i Nongwainunu. Kangi ubwēne—ubwēne bo Bwēlu ukwēndāmo mpaka u Mwanundumiana ikufyūka kangi, polelo i Kipānga nu Mwānundumiana, umwēsi ni lisuba, fikōnganania palikimo. Muketile? Umwēsi go kiyabo kya lisuba, kangi i Kipānga kyo kiyabo kya Kristi. Kangi akabalilo kāko ukusitakuyapo kwa Kristi, i Kipānga kikundalika u Bwēlu Bwāke. Kangi polelo nu busisimikisye būbo uswe tubagīle ukukēta u mwēsi gukumulika, ugwēne gumenye ilisuba likumulika kumo. Kangi akabalilo kosa Ikipanga kyaakongesyaga Lumuli lwa Kristi, Kristi ali mumi. Amen. Inogona isya ikyene.

³⁰ Lilino, u lulāgilo lwāli kyākwimilila kya ipyāna, lōli u lulāgilo lukāli na maka ga bupoki mu lwēne. U lulāgilo lwāli itolo u. . . U lulāgilo lwāli u gwāpolisi. U gwāpolisi ākubīkīle ugwe mminyololo, lōli, ugwe ukētīle, ikyēne kyālyēgīle ilipyāna ukukwēgako ugwe ukufuma ku minyololo. Muketile?

³¹ Popāpo i Lilopa lya Kristi, i Nongwainunu, likutuponesya uswe ukufuma ku butulwanongwa. U lulāgilo lukutupela itolo ukuya batulwanongwa. U lulāgilo itolo lwātīle, “Ugwe gwe ntulwanongwa. Ugwe ulingisa kwībamo. Ugwe ulingisa kulongwa ubulogwe. Ugwe ulingisa kuya nkēti gwābusyōbi.”

Muketile? Ulwēne yo gwāpolisi uyu ikuyoba ugwe uli nsobi kangi ugwe utobesigwe. Lōli i Nongwainunu yo nongwa inunu. Kristi āfwīle ukutupoka uswe ukufuma ku fyosa ifwa ngilanio syitu, insobi sya lulagīlo. Kristi āfwīle ukutusōsyāmo uswe.

³² Lilino, Pauli, nakalinga itolo bo umwēne apīndwīke, umwēne akālālwisye mo siku ku seminale, pamo nukuti ukwangalamo na balūmbilili balibōsa. Lōli ngimba umwe mukētēsīsyē? Umwēne āsulukīle kula mu Arabia, kangi āli kula ifyīnja fitatu, mu Arabia. Lilino, iki kyo, mminogono gāngu, ukuti . . .

³³ Lilino, uswe tukufīmbilisigwa ukulwāga ulwālo lwa iki, popāpo uswe twisakumanya mūmo kiyīlīle ikyēne ukuya kyāmbombo. Kangi akamanyisyo kakwānda, ikilo iki, uswe tukwēgāga ulwālo.

³⁴ Lilino, Pauli āli mmanyisi gwa i Bāngēli gwa luko, panongwa yakuti umwēne āmanyisigwe pāsī pa unkulumba, mfumuke akabalilo-kōsa Gamalieli. Kangi umwēne āli yumo mwa bafumuke ukukinda aba lisiku lila, ummanyisi unkulumba yula ugwa lulagīlo na basololi. Polelo, Pauli āmanyisigwe kanunu mu ifindu ifyo.

³⁵ Kangi polelo une nunganile umwēne mu njila iyi, ubusetuli ubukulumba ubu, ukuya gwabwanaloli mu ndumbula, u ngogi, ālitikīsyē kufwa ya Stefani kangi ākētīle Stefani ikifwa pāsī pa mabwe ni sangalabwe ukufuma kukutūnyigwa ku bufwe. Une ngwinogona ikyēne kyābagīle ukufika kifuki kwa Pauli akabalilo kāko umwēne ālimbwēne Stefani ikufyūsya amaboko gāke ku Mwānya, nukuyoba, “Une ngukubona ku Mwānya kwīgīwe. Une ngukēta Yeso imile pa kiboko ikitalusye kya Kyāla.” Kangi umwēne alinkuyoba, “Tāta, komma ukubīka inongwa ya butolwanongwa ukulwana na bēne.” Kangi umwēne alinkugona utulo.

³⁶ Ngimba umwe mwakētēsīsyē ikyo? Umwēne akāfwīlēmo siku. Umwēne āgonīle utulo. Itolo ngati . . . Une ndikwītīka mma umwēne ālipīlīkēmo siku ilibwe ilīngi. Itolo ngati u mwāna pa kipāmbāga kya nna, ikugona utolo, Stefani alinkugona utulo mu ngongi sya Kyāla.

³⁷ Kilipo ikindukimo, ukufwana na Pauli, iki kyāli kifuki nu mwēne. Polelo umwēne, u mūndu aligwēsa pāsī pa butobesigwe, ikugela ukulwāna ni Kyēne, umwēne ukubopela kula ky mputi nkulumba nukwēga abakalata bāmo. Alinkuti, “Une ngwisakubakolaga abandu aba bōsa aba bikupela unjwēgo gosa gula, akgni bala abasāmbuke;” aba begigwaga ukuya, iki uswe tubagīle ukukikōlēla umwīsūgu, “abūmilisi abasitakukolīgwa,” pamo ikindukimo bo ikyo, ukupela unjwēgo gu mwīngi nukutēdeka ulufubānio. “Uswe tukusulukāga itolo nukwakubatamīsyā ikyēne.”

38 Kangi pa nsebwe gwāke ukusuluka, akanini akaiyolo... komma unkulumba unswebwe gwapamwanya ngati ugu uswe tukwëndāmo mma. Kangi imisebwe gila mu Palestina, itolo utuyila utunini, ngati injila ya ng'ombe ukukīnda mmatengele kūko ing'ombe, kangi ing'osi, kangi i falasi, kangi i mbūnda, kangi i kameli, syābūkāga pamwanya pa twāmba.

39 Polelo Pauli, ba nsebwe gwake ugwa ku Damaska, kifuki pamūsi, ilisiku limo, u Bwēlu ubukulumba bukumulika pāsi kangi bulinkūtīkīla umwēne pāsi. Nayumo ābubwēne Ubwēne lōli Pauli. Une ngulonda umwe ukukētēsya ikyo. Kangi papapa apa, iki kikaya kuti nguyoba sya yumo mma, lōli itolo ukuti uswe tulongolelēge mu lwālo ulu. Ukuti umwe mukumanyaga ukuti Yeso yulayula. . .

40 Lilino, akabalilo kāko Umwēne āli apa pa kīsu, Umwēne alinkuyoba, “Une nīsīle ukufuma kwa Kyāla, kangi une ngomokela kwa Kyāla.”

41 Lilino, akabalilo kāko Umwēne ālongolīle abāna ba Israeli, Umwene ali yo Mbānda ya Mōto. Kangi Umwēne ātēndekīgwe ukuya mbili, polelo Umwēne alinkugōmokēla ku yilayila Mbānda ya Mōto. Polelo akabalilo kāko Umwene āganēge na Pauli pa nsebo gwake ugwa ku Damaska, Umwēne ali Mbānda ya Mōto yila, lūla u Lumūli, muketile, u Lumuli ulukulumba. Kangi Pauli alinkuti, “Yo ani yo Umwēne une ngufwīma?”

42 Umwene alinkuti, “Une ne Yeso, Uyu ugwe kufwīma,” u Bwēlu. O, ngimba Umwene akaya nswigisye?

43 Kangi apa Umwene alipo, ikilo iki, papapa apa na uswe. Ālyēgīgwe ipīcha Yāke kulakula kula, i Kindu kilakīla, muketile, Mbānda ya Mōto, Bwēlu, itolo mulamula mūmo Umwēne āyīlīle, “Yulayula mmayolo, umusyugu, na bwilanabwila.”

44 Lilino abanyāmbāla aba bāli nu mwēne bakābubwēne u Bwēlu bula, lōli Ubwēne bwāli pala itolo lulalula. Ifyakukōnga fyāpēle kilakila.

45 Lilino, ngimba ikyēne kyakubagīla ukuti—ukuti yumo ābagīle ukumbona Kristi mu liyumba ili kangi nayumo uyūngi ukumbona Umwēne? Naloli. Ikyene kyabonike kula.

46 Ikyene kyabonike kangi ikilo kimo akabalilo kāko Peteri āli nnyumba ya baminyololo. Kangi u Bwēlu bula bwālīsīle mu nyumba ya minyololo, nukumpalamasya Peteri, nukwēnde palapala pa lubafu lwa nsikali gwankati, nsikali gwapanja, ukwēnda palubafu lwa kipata, ikipata ikinywāmu, kangi ikipata kya kāya. Peteri alinkuti, “Une mbagīle ukuti nagogwāga injosi.” Lōli umwēne akinkukelengania, lōli u Lumuli lwākīndīle; Kristi, u Gwasypwa yula, u Bwelu ubusitakumulika. Pala Umwēne alipo. Lilino, pa nsebwe ugwakusuluka. . .

47 Kangi kēta, ikindu ikīngi, linga uswe twābagīle ukuyoba isya iki, itolo kisile mu linogono lyāngu. Lōli abanyāmbāla

abamahala aba bākōngesyága u Lutōndwa, injila yosa ukufuma ku India, Kubusōkélo, myēsi, ukwisa ukukinda mfikōga na malangalanga (balinkulania ifyakukētēla; kangi abēne bākyūngága akabalilo ka pakilo ukwisila mu ndōndwa) kangi nayumo ugwasyāmbukúlu pamo aligwēsa isyakuti nasiku balubwēnémo u Lutōndwa lūlo lōli bēne ba bamanyandōndwa. Ikyēne kyāsūnguligwe ku bēne ukulubona Ulwēne.

⁴⁸ Popāpo ugwe ubagīle ukukēta ifīndu ifi umwīnitu uyūngi akabagīla ukukēta. Kwa ugwe, Ikyēne kyo kwanaloliloli. Ku mwene, abene batikukipilikisya mma. Itolo ngati ulupīndúko; ugwe ubagīle ukupīnduka nukwikyēla isayo sya Kyāla, itolo—itolu ukunwa mu sayo sya Kyālo. Kangi umwīnitu uyūngi, itūgēsye kifuki na ugwe, “Une ndikukēta ni kīndu nakimo.” Muketile? Muketile? Ikyo kyo ikyēne. “Une itolo ndikukipilikisya ikyēne mma. Une ndikukibona iki ikyēne kyo kya fiki.” Ena, umwene atikukibona itolo Ikyene. Ikyo kyo kyosa. Kuko, ugwe uliko.

⁴⁹ Ketesya lilino, Pauli oa nsebo gwake ikusuluka. Kangi nakalinga itolo bo ikyakumbonekela ikikulumba iki kyāboníke ku mwēne...Lilino, umwene akalīkutīle mma...Ikyo kyo kikipela Pauli ukuya nnuu fiyo.

⁵⁰ Lilino, ikimanyisyo kyītu ikilo iki kikaya kisolofu mma. Ikyēne kyo kimanyisyo kyapamwanyamwanya, lōli, o, uswe tukufikaga ku busolofu, ukufuma pa kabalilo. Lōli iki kyo kimanyisyo kyamwanyanya fiyo, lōli ikyēne kikwānda itolo. Kangi iki ikyēne kili, ikyēne kyo kindu kimokyēne, iki kyo kikufyūsya Yeso Kristi. Pauli, ukwānda.

⁵¹ Kangi no umwēne akāli ukubōmba iki, Pauli āli mfunda i Bāngéli. Kangi u mfunda i Bāngéli atisa kubīkāmo siku ikimanyisyo kyāke pa fyakumbonekela. Umma, nkulumba. Abene batisakubīkamo siku ikimanyi kyābo pa fyakubonekela. Ugwe ubagile ukuya nu luko lulilōsa ulwa kyakukubonekela. Loli ikyēne kikufimbilisigwa ISI SYO IKUTI U NTWA. Kotalusya.

⁵² Lilino, mu Lwitikano Ulukulu, abene bāli ni njila itatu ingindanengindane abene bābagile ukumanya indumi. Ikyākwānda, ululagīlo, lula lwāli itolo lulagīlo. Polelo, abene bāli nu—nu nsololi; u gwānjosi; kangi abene bāli na Urimu Tumimu. Lilino ikyo kibagile ukuya kisolofu panini.

⁵³ U Urimu Thumimu yāli sahani yapakipāmbága iyi Aaron āfwālága pa kipāmbága kyāke. Mula syālimo isangalabwe kalongo na sibili: yaspara, saradisi, carabanku, na fyosa bo ifyo, ukukīndilīla ukusuluka. Abēne bāli nasyo syōsa isangalabwe inywāmu, isi syāli mu sahani yapakipāmbága, ukunāngīsya ukuti umwēne āli yo mputi nkulumba gwa lūko lōsa lwa bāndu, uluko kalongo na ibili lwa Israeli. Isahani yapakipāmbága iyi yapayikgwāga pa mbānda nkipānga. Kangi

akabalilo kâko u nsololi âsôlwîle, kangî abêne bâlôndaga ukuya basisimikisye ikyêne kyâli kitalusye, pammo mma, abasololi pamo abagogwanjosi bîmâga pankyêne pa Urimu Thumimu uyu, nkuyoba injosi yâke pamo imboniboni yâke, kilikyôsa iki umwêne âkibwêne. Kangî linga u Bwelu Ubwîkêmo... O, ngimba umwe mukubona ikyene? Kyala akabalilo kalikosa ikwitugasya mu ndubafu ulukîndakipeligwa. Ulufuluhano, imululi sila, syâli itolo kanunu mpaka ilisyu ili lyâsôkile panja. Kangî akabalilo kâko ilisyu lyâtîkîle isangalabwe sila, linga ikyêne kikâli kikîndakipeligwa, umwêne âyaga kimyemye. Lôli linga ikyêne kyâli kikîndakipeligwa, i Mulimuli sila syôsa syândalikâga ilângi sya kipîngafula palikimo. Amenî. Polelo, yula âli Kyala ikuyoba, “Uyo yo nsololi Gwangu.” Pamo, “Injosi yila yâlîsîle ukufuma kwa Une.” Ikyene kyâli kyakufwâna na Urimu Thumimu yula iki abêne bikulônga.

⁵⁴ Kumbukilâga Sauli akabalilo kâko umwêne âgomokîle nyuma? Umwêne alinkuyoba umwêne alinkutoligwa ukuya ni njosi. Kangî u nsololi, Samueli, âfwîle, kangî yikâlipo ni njila nayimo. Umwêne alinkutoba, “Yope na Urimu atisa nukuyoba kwa une.” Nakimo. Sauli âlîmîle pankyeni pa Urimu, kangî amasyu gâke gâli kukung’unda ukufwâno. Muketile? Kyâla âlinkânîle itolo umwêne. Kangî u Urimu Thumimu yula, kila kyâli kisisimikisi kya Aroni isya bupûti bwâko. Ukufuma pa kusôkâpo kwa Aroni, Môse, i—i sahani yapayikigwâga pa mbânda.

⁵⁵ Lilino, ubupûti bwa Aroni bwâmalîke akabalilo kâko Yeso âfwêge. Kangî lilino, ukupâgulania ululagîlo ukufumu ku ipyâna, uswe tukâlî tuli na Urimu Thumimu. Kangî Pauli âbombelâga imbombo Ikyêne. Muketile? U Urimu Thuminu umwîsyûgu lyo lyaKyâla, Ilisitakufwa, Lyasyêpwa, i Lisyu ilisitakumalika. Muketile?

⁵⁶ “Kabuno aligwesa uyu isakwegamo ukusôsyâmo kalikôsa ka Bûku uyu, pamo ukôngelêla kalikôsa ku Lyêne.” Une ndikulônda kalikôsa ka Ilyêne, lôli une ngulônda lyôsa ili Ilyêne lilinalyo. Ikyo kyo Kipânga uswe tukulônda. Kangî ifindu fyosa fibagile ukuya fisisimikisigwe ni Lisyu.

⁵⁷ Iyo yo nongwa une nâtoligwêmo lululu ulu pakati pa bându aba Kipentekosti, panongwa yakuti, ukuyoba, “Une nâtoligwe ukupîlikisya kûko amafuta gikusôka ukufuma mmaboko gînu, pamo ililopa ukufuma nkîsyo kînu, kyaali kimanyilo kua Mbepo Mwikemo.” Ikyo kikaya Kyammasimbo kangî une—une ndinkutoligwa ukukyêga ikyêne. Ikyêne kikufîmbilisîgwa ukwîsa ukufuma mu Lisyu.

⁵⁸ Kangî lilino, Pauli, umwene âliganîle itolo i Lisyu. Popâpo, bo umwêne âkâlî ukubîkîla ubukêti siku ikyakubonekela ikikulumba iki iki umwêne âli nakyo, umwêne âbûkîle ukusuluka mu Igupti ku fyînja fitatu. Une ngwitika ikyêne

kyāli fyīnja fitatu, ifyīnja fitatu kula mu Igupti. Kangi umwe mumenye iki une ngwitika umwēne ābombīle? Une ngwitika umwēne ālyēgīle u Lwītikáno Ulukúlu, nukulōndesya ukukīndamo mu Lwītikáno Ulukúlu, nukwāga ukuti Yūla naloliloli āli Mesiya gwanaloliloli. Umwēne alinkufimbilisigwa ukusisimikisya ifyakumbonekela fyāke ukwisila mu i Bāngéli. Ameni. O, mwe!

⁵⁹ Keta ku mwene akabalilo kako umwene aali minyololo. Umwe mukukētésya, yilipo i—i fwāsi ya būmi bwa Pauli akabalilo kāko umwēne āli mminyololo kula kukabalilo katali. Umwēne āsīmbole Būku gwa Baefesi. Umwēne āsīmbole u Kalata gwa Bahiburi uyu. Muketile? Umwēne āli na kabalilo. Kyāla ālindongwīsyē umwēne ukunsōsyāpo ukukilania kula mminyololo, kangi umwēne āsīmbole a Bakalata aba ku fipānga. Yumo ku kipānga kya Baefesi. Umwēne āsīmbole yumo ku kipānga kya Kipentekosti, āli ni ndamyō nyingi fiyo na bēne. Ikipānga kya Kipentekosti umwēne āli ni ndāmyō nyingipo ukukīnda aligwēsa uyungi. Kikāli kili nalo. Lōli umwēne āpālisiyāga panongwa ya bēne. Ikindu kyene iki umwene ābagīle ukubamanyisa abene...Akabalilo kako abene bikwīngīla: yumo āli nu lulimi, yumo āli nu lwīmbo, yumo āli nu kunyegēsya, yumo āli nu kwīpilika. Umwēne akābagīle ukuyoba, ukuyoba ku bēne, “Ubuponesigwe bwasyēpwa.” Umwēne akābagīle ukuyoba bēne, “ukusunguligwa-ngāni.” Umwēne akābagīle ukuyoba ku bēne, abēne bāli bāna. Abēne bōsa balinkufimbilisigwa uku—balinkufimbilisigwa ukwīpilika ikindukimo, pamo ukukēta ikindukimo, pamo ukuya ni kwākwīpilika ikyakunyegele, kangi, pamo ikindukimo ukusyūngutīla abēne, ikyakusisimikisya kimo.

⁶⁰ Loli une ngwitika, akabalilo kako umwene ayobaga ku Baefesi, umwene aabagile ukuyoba pa, “Kyala atusungulile uswe ngani ukuya banabalumiana na banabalindwana, kangi atufwikile uswe ukuya bana mwa Yeso Kristi bo lukaligwa ulwalo lwa kisu.” Keta ikyo. Mwe!

⁶¹ Nketesya umwene ikwisa mula mwa Buku gwa Baroma, na fyosa bo ifyo. Abene bali bakusi. O, abene bayobaga mu ndimi, naloli, kanga bali ni fimanyilo fimo ifya Mbepo Mwikemo pakati pabo. Loli abene bakatendike ifimanyilo, kangi ifyakwinyegesya, kangi ukwikinya ukunini, kangi ukwipilika ukuhesya.

⁶² Pauli alinkuti, “Umwe—umwe—umwe mukubuka ku lwenge na ikyo. Akabalilo kaako umwe mukulondigwa ukumanyisya, umwe mukali muli banike kangi mukufimbilisigwa ukunwesigwa ulupyu.”

⁶³ Lilino, ikyo kyo iki une akabalilo kosa ngelile ukulwila ubwite ikipanga iki ukuya, komma ikipambo kya banike. Unko uswe tukule. Ina pa nsebwe. O, mwe! Mwaketa lelo.

64 Popapo, Pauli ikubuka ukusuluka kula, ikyēkwānda, ukukēta linga ikyākumbonekela kyāke kyāfwānāga ni Bāngéli lya Kyāla.

65 O, ngimba ikyēne kitisakuyaga kinyāfu, umwīsyūgu, linga abāndu bābōmbāga kila kāngi, linga uswe twātēndekaga ikyakutubonekela kyītu ukufwāna ni Bāngéli lya Kyāla? Linga ikyēne kitikufwāna, kokuti ikyakutubonekela kyītu kisobi; ikyēne kitikumulika mu Urimu Thumimu. Linga ikyēne kikumulika nkati Mula, ameni, manya ugwe ulinakyo Ikyēne. Lōli linga ikyēne kitikubōmba, kimo... Une ndikupāsyā kali ikyēne kinunu bulebule, mūmo kyanaloliloli ikyēne kyabonekāga ngati kyāli kitalusye; linga imuli sila sikāmūlike pamwnya pa Urimu Thumimu, ikyēne kyāli kisobi.

66 Kangi kali kyakukubonekela kinywāmu bulebule ugwe gwāli nako, bwanaloliloli bulebule ikyēne kyabonekaga ukuya, kali ikyēne kitwālāga kyēne bulebule, kali kyāli kyabumanyi bulebule, kyo kyōmbo ikikulumba bulebule ukukaba imyoyo; linga ikyēne kitikumulika mu Lisyu, ikyēne kisobi. Kotalusya. Ikyēne kikufīmbilisīgwa ukugolokana ni Lisyu.

67 Lilino, une ngwītika mu... palipo pakatikati pa nsebwe. Injila, lilino, utubalilo twīngi... Une nālisibīle ukubūka ku kipanga kya Nazarene. U Ntwa abasaye abāndu bala. Abanjila-syaiyolo, abakemesīgwe ba kiMethodisti kyo iki abēne bali; kipānga kya Kyāla, Nazarene, Pilgrim Holiness, ni fīngi fya fipānga ifinunu ifyaiyolo ifikēmo fila. Kangi abēne bālisibīle ukwīmba ulwīmbo:

Une ngwēnda mu nsebwe unywāmu unnunu
ugwaiyolo,
Ukubabūla kulikōsa une ngubūka,
Une kinunupo njege gwanjila-syaitolo u
Nkristi, Ntwa,
Ukukinda kilikyosa une mmenye.

68 Kinunu. Kwakuswīgīsyā. Kangi polelo abēne bālisibīle ukuyoba isya unsebwe-uniywāmu gwa bwīkēmo. Lilino, linga umwe mukubala pa ikyo, abēnr bikukyēga ikyo ukufuma mwa Yesaya, untu gwa 35. Lilino, linga umwe mukukētēsya, umwēne alinkuti, “Kwisakuyapo unsebwe-uniywāmu, *kangi* injila.”

69 Lilino, *kangi* yo mulungisi. Muketile? Unsebwe-uniywāmu, ugwēne gukāli nswebwe-uniywāmu gwa bwīkēmo. “Ugwēne gwisakuyako unsebwe-uniywāmu, *kangi* i njila, *kangi* iyēne yisakukōlélīgwāga, ‘I njila ya bwīkēmo,’ komma unsebwe-uniywāmu gwa bwīkēmo. “Injila ya bwīkēmo!” Kangi injila ya nsebwe pa pakatikati pa nsebwe. Ugwēne gubūmbīgwe bo *ulu* ukuti amīsi gisakusukilāga amakāndi, ku mbafu syosa ibili, ukukyūnga unsebwe ukuya mwīfyūsi. Umwe mutikusulwa, umwe muli ni fitubwe fikwīma pa nsebwe gwīnu, akabalilo kōsa,

linga ugwēne gukayēngigwa kanunu. “I njila” yo pakatikati pa nsebwe.

⁷⁰ Lilino, pa lubafu *ulu*, akabalilo kāko abāndu bikwisa ukuya bapindúke, aminogono gābo gikubikígwa kanunu pa Kristi. Kangi linga abēne bo itolo bali kanini bafundafunda, kangi batikūmilisya pāsi pa lwīpúto, abēne bisakufikága ukuya batalalifu fiyo, kangi bakafu, kangi bakafukafu, kangi basitakupāsyā. Kangi polelo linga abēne bali itolo panini bakwipilikapilka, linga umwe mutikukētésya, abēne bikwisa itolo ukuya bākukinakina kangi bāndísu, pa lubafu *ulu*, muketile, abēne bikubūka mu syakunyegeśya na filifyōsa.

⁷¹ Lilino, lōli, i Kipānga ikyanaloli kyo Nongwainunu iyanaloli yamahala, mulamula pakati pa nsebwe. Ikyēne kitikuya kitalalifu pamo kikafukafu, pamo kikaya kyakukinakina. Ikyēne yo inunu naloli, iyaiyolo, i Nongwainunu indūngúle, ulupilikigwa-mundumbula u lugāno lwa Kyāla, kikubūka ukusuluka mulamula pakati pa nsebwe, ukukóléla ukufuma ku mbafu syosa-sibili. Uko ko kutalusya. Lilino ikyo kyo. . . Kangi mumo ugwe kubuka ku kipanga iki? Palapala ukufuma pa Lisyu, Urimu Thumimu.

⁷² Lilino, Pauli ālōndága ukutwāla i kipānga iki palapala pa nsebwe, popāpo umwēne alinkubūka nukwakufūnda ifyīnja fitatu pa Masimbo aga umwēne āmenye. Polelp, Pauli āsīmBILE ikiyabo ikinyāmúpo kya Lwítikáno Ulupya ulu. Kyāla ālintwēle umwēne ukubōmba ikyo panongwa yakuti ukwēne kukwisa i ngulilo ya Bāpānja. Matai, Mariko, Luka, na Yohani, i Nongwainunu ina, abēne bāli baYuda. Lōli Pauli āsīmBILE bingipo abakalata bala.

⁷³ Lilino kētésya, lilino, uswe tukuyaga pakwanda ukulwēga ulwālo ulu lilino, kūko umwēne aliko, ikusimba Ilyēne, ukufuma mmnyololo. Kangi umwēne afumile pakuya nifyakūmbonekela fyosa ifi. Lōli, ikyākwānda, ikyakumbonekela iki ikyākwānda kyāsisimikisigwe, kangi uyu yo kalata gwāke gwakwīgúla ku kyēne. Uyu yo kalata gwāke gwa fungulo. Baroma na Baefesi, na fyosa bo ifyo, fili nu buyo bwābo, loli uyu yo kalata gwa fungulo.

⁷⁴ Lilino, untu gosa gwa 1 *go* gukumfyusya Yeso, nukumpāgúla Umwēne ukufuma kukuya nsololi. Iyo yo fundo yosa lilino. Une ngugelaga ukufika ku kyēne itolo nakalinga mūmo une mbagile lilino, ukuti tungitugasyaga akabalilo katali fiyo. Ifundo yosa *ko* kupāgulanía unto umpya- . . . mpya . . . Untu gwa 1 *go* gukupāgúla Yeso ukufuma ku nsololi aligwēsa, pamo ululaligilo lulilōsa, nukunāngisya Yūyo Yeso ali. Lilino keta, “Kyāla.” Uswe tukwānda itolo, ilisyu, ukwanda, “Kyāla.”

Kyāla, ku tuba- . . . *yūyo* ku *tubalilo*
utukindakindane . . .

Utukukindanekindane kukoti “kubutali kunyuma,” akabalilo kākunyūma.

*...ntubalilo utukindanekindane mu njila
ingindakindane alinkuyoba ku ba tata ukwisila
mbasololi,*

⁷⁵ Lilino, muketile, “Kyala, ntubalilo utukindanekindane, mu njila ingindakindane, Umwene alinkuyoba ku ba tata ukwisila mbasololi.” Iyo yo nongwa Umwēne afīmbilisigwāga ukupa Indumi Yāke, ukwisila mu nsololi Gwake.

⁷⁶ Kyāla ātumāga u nsololi Gwāke bo yu Eliya, Yeremiya, Yesaya. Kangi linga ugwe kwisakukētēsya, nasiku mu syāmbukūlu syōsa isya kīsu, ikipānga kitwēlémó siku u nsololi. Lōndēsya ikyēne mu Lwītikāno Ulukūlu, u Lwītikāno Ulupya, pamo mu lisiku ili, mu lisiku ilyabumalikisyo. Nāngisya une nsololi aligwēsa ākusigwémó siku nkipānga mu lisiku lwabumalikisyo. Nāngisya une yumoywēne isilémó siku pala, ukusōka. Kangi nnāngisya une akabalilo kamokéne aka u nsololi, ugwāmbómbo gwanalololi gwa Kyāla, uyu ulubatiko lwa kipānga lwa kīsu lukālīmufuyīle umwēne.

⁷⁷ Itolo inongona isya ikyēne. Yeremiya, Yesaya, bōsa ukusuluka ukwisila mu Lwītikāno Ulukūlu, abēne bākifuyīle ikyēne. Yeso āyobīle, “Umwe mukumogesya amapūmba ga basololi nukugapela agēne mēlu, kangi umwe mwababīkīle abēne mula.” Uko ko kotalusya.

⁷⁸ Ikipānga kikukīndilīla ikyo. Kēta Mwikémo Patrick. Umwe baKatolika mukummwēga umwēne ukuya gwīnu. Umwēne akaya nKatolika ukukīnda mūmo une njilīle. Uko ko kotalusya. Lōli mukummwēga umwēne ukuya gwīnu.

⁷⁹ Nkēte Mwikémo Francis gwa Assisi. Mupokile umwēne. Umwēne akaya nKatolika nakingipo ukukīnda mūmo une njilīle.

⁸⁰ Nkēte Joan gwa ku Arc. Umwe mwālimmōkīkye umwēne pa mbānda, ukuya ndosi, panongwa yakuti umwēne ākētāga imboniboni kangi yo gwamwambepo. Ukummōkya umwēne pa mbānda. Kangi unkīkūlu yula ikukūta ukupelelīgwa ikisa, kangi abēne balinkummōkya umwēne pa mbānda. Kifuki ifyīnja mia yumo, abēne balinkusyāgānia ukuti umwēne āli nsololi gwakikīkūlu. Umwēne āli gwāmbómbo gwa Kyāla. O, twitikisyege, umwe mubōmbīle ulufūndo ulunywāmu: ummwe mwāfūkwīle imibili gya bapūti nukusopa igyēne mu lusoko.

⁸¹ “Umwe naloli mukunosya amasyeto ga basololi, nukubabīka abēne nkati mula.” Kotalusya. Nasiku ulubātikāno lwa kipānga lusōsisyémó siku u nnyāmbāla gwa Kyāla; nasiku kikabōmbigwāmo, kikabōmbigwa umwīsyūgu, kangi kitisakubōmbigwāmo. Ubwiputibuti ububātikīgwe bukayamo siku bubōmbélo bwa Kyāla.

⁸² Ikipanga ikikūlu ukukīnda fyōsa nkīsu ikipāgūke kyo kipānga kya Katolika; Luteri, kyakibili; polelo ikwīsa Zwingli; ukufuma Zwingli, ikwīsa Calvin; Calvin, ukukīndilīla, aba

Anglikani, aba Anglo-Saxon bikwégápo, polelo ikipānga kya Anglikani; kangi Mwalafyāle Henry gwa Lwēle, akabalilo kāko umwēne afūyēge, na fyōsa bo ifyo; kangi ukukīndilīla ukusulukila kwa Wesley Methodisti, na ba Nazarene, Pilgrim Holiness; kangi ukukīndilīla ukusuluka ku kyabumalikisyo, yo Pentekosti, fyosa fipāgwīke. Kangi i Bāngéli pabwelu likumanyisya ukuti i kipānga kya Katolika kyo u—u nkīkūlu umfumuke-nububibi, kangi ifipānga ifya Protestanti ni fipāngānio fyābo fyo bāna balindwana bāke, Busetuli 17. Ikyo kyo katikati kutalusya. Polelo abene bali. . .

⁸³ Komma abāndu, lilino. Bulimo ubununu mu fyosa ifipānga fila; abakemesigwe, abandu abapokigwe. Lōli Kyāla atikukōlēla abāndu Bāke ukwisila mu kipāngānio. Umwēne ikubakōlēla abēne pabene na bēne. Kyāla ikubombela na bandu bēne na bēne, kali ugwe uli gwa Methodisti, Baptisti, Protestanti, kangi Katolika, pamo kilikyōsa iki ugwe uli. Kyāla, bo ulwālo lwa kīsu lukāligwa, ākumēnye ugwe, kangi akusūngulīle ngāni ugwe ku Būmi Bwasyēpwa, pamo lumo ugwe gwasūnguligwe ku butāgigwe Bwasyēpwa. Komma. . .

⁸⁴ Umwēne akāligānīle ukuti ugwe upyūtīgwe, ugwe ubagīle ukupyūtīgwa. Lōli, Umwēne ukuya nsitampaka, Umwēne āfimbilisigwāga ukumanya ubumalikisyo ukufuma ku bwāndīlo, pamo Umwēne akaya Kyāla. Popāpo Yeso akālisilēmo siku ku kīsu itolo ukuyoba, “Mulimosa, Une nisakukēta linga umundu yumo ikuyaga kisa. . .Linga Une ngubōmbēla nu kufwa, mu njila ingafu, abēne lumo bisakwīnogōna, ‘Mulimosa une. . .’ Ikyēne kisa—ikyēne kisakupepeka indumbula syābo, kangi abēne bisa. . .” Kyāla atikwēndesya imbombo Yāke bo ulo.

⁸⁵ Yeso ālīsīle panongwa yimoyēne itolo, ko, kupoka bala bābo Kyāla, bo lukāligwa ulwālo lwa kīsu, āmēnye babagīle ukupokigwa. Umwēne āyobīle lulo. Uko ko kutalusya. Popāpo ugwe uli. . . “Ikyēne kikaya umwēne uyu iganile, pamo umwēne uyu ikubopela; ikyēne yo Kyāla uyu ikināngisya ikisa.” Pauli āyobīle ikyo. Unnyāmbāla yulayula apa.

⁸⁶ Umwēne āyobīle, “Iyo yo nongwa Kyāla ābagīle ukuyoba, bo akāli Esau pamo Yākóbo bosa-babili ukupāpīgwa, Umwēne alinkuti, ‘Une nunganīle yumo kangi numbēngīle uyungi yula.’” Bo akāli nayumoywēne undumiana akapāpīgwa, Kyāla āmēnye ukuti Esau āli gwāsōni, kangi Umwēne āmēnyeukuti Yākóbo āli u. . .umwēne abuganīle ubwabuke bwakupāpīgwa bwāke. Popāpo Umwēne āmenye, bo ikīsu kyākāli kikabūmbigwēmo siku, ukufwana ni kyēne. Lilino, uswe tukuyaga pakusyāgānia mu miniti Yūyo uyu āli uyu āmēnye ikyēne. Untu ugu gulinakyo ikyēne.

Kyala, . . .ntubalilo *utukindanekindane* mu njila ingindakindane alinkuyoba. . .ku *ba tata ukwisila mbasololi*,

Mmasiku agabumalikisyo aga ayobile kwa uswe ukwisila mwa Mwanundumiana gwake, . . .

Abōmbile fiki? “Ayōbile kwa uswe mmasiku gābumalikisyo aga ukwisila mu Mwanundimiana Gwāke.”

⁸⁷ Lilino, ngimba umwe mukwīnogōna bulebule lēlo, ukuti, ngimba ikuyaga fiki u nsololi? Ngimba uswe tubagile ukuya nu nsololi lēlo ugwa lisiku ili? Naloliloli. Umwene abagile ukuyoba ukwisila mwa uswe? Naloli. Loli umwene kila . . . Abasololi aba lisiku lyaiyolo bāli Mbepo gwa Yeso Kristi.

⁸⁸ Lilino, unko uswe tukigolosye kila, ’nongwa yakuti une ndikwīnogōna ikyēne kikwīngila kanunu mma. Lilino, iyi yo itolo ngati Sukulu ya Pandungu, popāpo uswe tukulōnda ukufikisya iki pabwēlu. Muketile?

⁸⁹ Kētésya. Unko uswe twēge Mbepo gwa Kyala uyu āli mwa Mōse, nubupelelesye u . . . ali nsyūngulu gwa ngāni gwa Yeso Kristi. Bosa abākinaji ba Lwītikāno Ulukulu bikubikila ngani unsyungulu gwa kipīngika. Mōse, apāpīgwe mwāna umfwāne, ukufīsīgwa mu kitūndu, ukusōsīgwako ku bapāpi bāke, na fyōsa, kangī āli . . . Umwēne āli mwalafyāle, pamo u—u ndōngōsi, umpa-lulagīlo, mwimila-pakati, mpūti. Kilikyōsa iki umwēne abikīle ngāni unsyūngulu Kristi.

⁹⁰ Nkēta Yosefu, ālinganīle u gwīse, ābēngīgwe na bakundwe bāke, kangī ukūlisīgwa pa kifuki utupatu malongo matatu twa siliva. Ukusopigwa nkibwīna, kifuki mfwano; ukusōsīgwāmo. Mbukubilwe bwāke, umwengabwalwa ikupokigwa, kangī unkekanyama ikutāgīgwa; abahihi babili pa kipīngika. Kangī polelo akabalilo kāko umwēne ikusōka pānja, umwēne afyūkile ukufuma nkibwīna kila, kangī ātūgasīgwe ku kiboko ikilīlo kya Farao, ikikabi ikinywamu ukukīnda . . . i—i—i kīsu iki kyākomīle fyōsa ifīngi ifya kīsu. Kangī nayumo umundu abagile ukwisa kwa Farao pene papo abene bikwisilaga mwa Yosefu; Yeso itugesye ku kiboko ikililo ikya Kyala, kangī nayumo umundu abagile ukwisa kwa Kyala pene papo ikwisila mwa Kristi. Kangī akabalilo kāko Yosefu āsōkīlēpo pa kikota nukunyamukapo pala, abanyāmbāla bābūkāga pankyēni pa umwēne, bikulāta nukupūta ingangabwīte, ukukuba ingangabwīte, bikuyoba, “Inama umwe! Yosefu ikwīsa.”

⁹¹ Kangī akabalilo kako Yeso ikwisa, ingangabwite yisakukūta, kangī ilifūndo lililyosa lisakufugama, kangī ululimi lulilōsa lwisakulapa. Ena, nkulumba. Pala Umwēne ālipo.

⁹² Kangī akabalilo kāko Yosefu āfwīle, umwēne ālekīle ikikumbusyo ku bēne bābo bāgūlilāga ubuponesyo.

⁹³ Une nabikīle ikiboko kyāngu pa libokosi ilyaiyolo akabalilo katali aka kakīndilēpo, ilyēne lyātēndekīgwe ukufuma kwa lēdi. Kangī umbili gwāke gwābagīle ukwītūgāsya . . . ififupa fyāke . . . Alinkuti, “Komma umwe ukunsyila une kuno, kabuno ilisiku limo, Kyāla ikuyaga pakukuyātīla umwe.” Umwene āli nsololi.

“Kyala ikwisa ukubayātila umwe.” Kangi alinkuti, “Akabalilo kako umwe mukubuka ku kisu ikyālufingo, ega ififupa fyangu.”

⁹⁴ Aligwēsa u Nhiburi ugwaiyolo, ni nyuma yikomīgwe kangi yālilopa, ābagile ukukēta mula mu libokosi lila nukuyoba, “Ilisiku limo, uswe twisakusōka pānja.”

⁹⁵ Yeso ālekile ikyakukūmbukila, ilipūmba ilyābwāsi. Ilisiku lisiku limo uswe tukubūka kula ku lipūmba, kangi abaganigwa bītu, nukupilika utufu utunini utwaiyolo, akabalilo kāko abēne kikuyoba, “Līto ku līto, kangi umfu ku mfu, kangi ikīsu ku kīsu.” Lōli, nkundwe, uswe tubagile ukukēta ukukilania i nyānja, ku lipūmba ilyābwāsi. Ilisiku limo, uswe tukusōkangāpo apa. Uswe tukubūka ku Kāya. Umwēne ikwīsa. Kilikyōsa kyālimililigwe.

⁹⁶ Nkēta Davidi, akānīgwe ba bāndu bāke bēne, ukusōsigwāpo pa kikota na bāndu bāke bēne. Ukuya mwalafyāle gwa Yerusalemu, ālūndusigwe ukufuma mu Yerusalemu na bāndu bāke bēne. Kangi bo umwēne ābūkile pamwanya pa Kyāmba Mafilu, umwēne alinkukēta kunyuma nukukūta. Umwēne āpikīgwe.

⁹⁷ Ifyingi bamia lwēle ukufuma pala, u Mwanundumiana gwa Davidi, Mwalafyāle gwa Yerusalemu, ālītūgēsye pa kām̄ba nukukūtuta, ’nongwa yakuti Umwēne āpikīgwe.

⁹⁸ Yula āli Mbepo gwa Kristi mwa Davidi. Fyosa fyāpag’unsungulu ngāni ikipingika. Abasololi bala ukugomokela kunyuma kula bāyobelāga mu Ngamu Yāke. Abene bitugasyaga mu Ngamu Yāke. Abene babombielāga mu Ngamu Yake. Naloli. “Kyala ntubalilo utukindanekindane mu njila ingindakindane alinkuyoba ku ba tata ukwisila mbasololi, loli mu lisiku iyabumalilo ili ukwisila Mmwanundumiana Gwake.”

⁹⁹ Popāpo abasololi na banyāmbāla abāmwāmbépo, ilisiku ili, ko itolo kundalika kwa Kristi. Pala, ukwisila mu lulagilo abēne bālimile, kēta. Ukukilania apa abēne bikwīma, bikukēta nyuma injila iyingi, ukwisila mu lipyāna.

¹⁰⁰ Ikyo mu Bahiburi 11, untu gwabumalisyo, une kingikingi nswigilēpo ikyo. Mu ntu gwabumalikisyo, ikiyabo kyābumalikisyo kya untu gwa 11 gwa Bahiburi, akabalilo kāko umwēne ikuyoba isya Abraham. Ulwītiko ulukulumba, kangi pa bumalikisyo, umwene āyobīle, “Abene balinkubēla mu fipapafyang’osi ni fipapafyambene, kangi bātekīgwe ukuya basitakāndu, basita buyo, kangi balinkukēkīgwa pakati. Abēne balinkubēla ukusyūngutīla, nabumo ubuyo ubwakubūkāko, bābēngīgwe, nukufūyīgwa, nukufwīmīgwa. Panongwa ya bāla, ikīsu iki kikaya kyākufikāpo pa bāndu bo bala.”

¹⁰¹ Polelo Pauli ikwīma nukuyoba, “Lōli kisita uswe abēne bakaya bapelelesye.” Kabuno abēne bākētēlāga itolo ku kipīngika, kangi uswe tukukēta *ukukindilila* i kipīngika. Uswe tuli nu Mbepo gwa Kristi bo Ikyēne kifumile ukuya mbili gwa

mundu nukwitugasya pakati pa uswe. Uswe tukwīsa apa na Mbepo Mwīkémó, ulu lo lubatikano lununupo kubutali fiyo.

¹⁰² Kangi utubalilo tumo une nguswīga iki i Kikristi kikulōnda umwīsyúgu. Undumbilili ikubūka nkāya kamo abagilīle ukuya. . . pamo ikipānga kimo ikipya pamo ukutumigwa kumo ukupya, ikwikōléla mwēne nsololi, ikwēnda pamwanya pala, ikuti, “Ena, linga abēne bikūmba une ihela inyingi mwakuti. Linga une mbagīle ukuya ni iligali ilinunu ukukīnda. Linga abēne bisa. . . Linga umfwālo gwāngu gwisakufyūsīgwāga imyesi mihano-na-gumo giligyōsa.”

¹⁰³ Uswe tukufimbilīsa ukuya banunu ukukīnda bōsa. Uswe tukufimbilīsa ukuya nu twāya utununu ukukīnda. Uswe tukufimbilīsa ukuya ni myēnda iminunu ukukīnda. Ngimba uswe twisakubōmba fiki akabalilo kālo uswe tukwīma mu kuyapo kwa banyāmbāla bala bābo bēmbēlága, mfipapafyāng’osi na mfipapafyāmbene, nabumo nu būyo bwa kulāmbalika imitu gyābo, bikwēmbēla mmatēngele? Kangi umundu yumo abagīle ukutūgīla uswe kangi uswe twītēndekīsyē ukukīleka ikipānga kangi kisita kubūkāka kāngi mma. Iki i Kikristi kikulōnda umwīsyúgu. Uswe tukulōndīgwa ukuya bakwīkosyasoni twībēne.

O Kyāla, yaga ni kisa kwa uswe.

¹⁰⁴ Mu lisiku lila, Umwene alinkuyoba ukwisila mu basololi, loli ilisiku ili ukwisila mu Mwanundumiana Gwake. Lila lyali lisyu lya nsololi, pala. Ili lyo Lisyu lya Mwanundumiana, umwisyugu. O, yisayigwege i Ngamu ya Ntwa!

¹⁰⁵ Mmasyu agāngi, linga ugwe kukēta ku nsyūngūlu, unsyūngūlu, ugwe ubagīle ukusoba. Lōli Iki kyo kipīyīgwe, ipiicha yo mbelelesye. Kila kyāla ukwisila mu nsololi; iki kyo ukwisila mwa Mwanundumiana Gwāke. Kila kyāli ukwisila mu nsyūngūlu; iki kyo ukwīsa mu kyakupamalasigwa. Ameni. Umwe mukupilikīsa ikyēne? Lukayapo ulusako ukutāga. Ikyēne kyo kīnda kyakupalamasīgwa, ilisiku ili ukwīsa mwa Mwanundumiana Gwāke. O, syo nnyāfu bule!

. . . *yuyo umwēne abōmbīle ansūngwīle gwakilingo . . .*
(O, mwe!) . . . *gwakilingo gwa findu fyōsa, . . .*

¹⁰⁶ Ngimba kyāli fiki ikyēne? Ulwēne lwāli lusūngulo. O, pilikīsa. Umwēne āsūngīgwe, Kristi āli, gwakilingo gwa findu fyōsa. O, u mōhēsi āménye ikyo, ukufuma mu ngunda gwa Edeni, umwe muketile, akabalilo kako u mōhēsi āpilike i Lisyu lila pala ilisiku lila, mu bulongi bwa bandu bala. Alinkuti, “Panongwa yakuti ugwe ufumile ku mfu, ku mfu ugwe kwisakugomokelāga; kangi u Luyūngu lwa nkīkūlu lwisakukuyubula untu gwa liyoka.” U Luyūngu ulufīngīgwe.

¹⁰⁷ Sētāno kingiking ākētesyāga ku Luyūngu lula. Akabalilo kāko Ábēlo āpāpīgwe, umwēne alinkuti, “Gwaketa lēlo ugwe, lula lo luyūngu.” Kangi umwēne alinkungoga Ábēlo.

U mwanundumiana gwāke, Kaini, alinkungoga Ābélo. Kangi nakalainga itolo bo Ābélo áfwile, umwēne alinkuti, “Une njifundile imbeyu.” Umwēne alinkuyikéka iyēnr. Umwēne alinkuti, “Une njágile iyene.” Lōli, ubufwe bwa Ābélo, ubupāpígwe bwa Sėti bwáli busyūke kāngi. Kētésya mūmo abēne bīsílága ukusuluka.

¹⁰⁸ Ulukīndi lula lwa Sėti, ulwēne lukusuluka pāsi, umwīyúfyē, unnyāmba ungolofu; ukukīndilíla pāsi ukukīnda Enóki; ukukīndilíla kwa Noa, ku bumalikisyoa bwa bonangiko bwa mwēléso.

¹⁰⁹ Keta ulukīndi lwa Kaini, balinkuya bāndu bakomu, bamanyili, sayansi. Ngimba i Bāngéli litukuyoba. . . Ngimba Yeso akāyobile, ukuti, “Abana ba nkīsu iki bakomupo ukukīnda a Bāna ba Kitangalala”? Kēka ku lubafu lwa Kaini pōpe umwīsyúgu: bakomu, bamanyili, bākwilāmwa, bīpútípúti fiyo; muketile, bīpútípúti fiyo, lōli basayansi, bayēngi, banyāmbála bakulumba.

¹¹⁰ Ega abanyāmbála abakulumba. Nketa u Thomas Edison, bingi abanyāmbála abakulumba. Keta Einstein, imibongo gya kīsu, mūmo-bikuyobela, umwīsyúgu, imibōngo gya kīsu. Lōli uswe tutikugela ukubōmbéla ubōngo. Uswe tukulileka i Linogono lya Kristi liyege mwa uswe, nukukēta ku Lisyu, nukukikóléla ikyēne lūlo.

¹¹¹ Abagānga bāmikota, palema nalinga uswe tukubapālisya abēne na filifyōsa uswe tuli nafyo, lōli bingi ba bāla bo bilāmwe, basitakumanyakyāla. Kēta abāndu abakomu kangi abamahala. Abēne bali pa lubafu lula kubwa kula, u lubafu lwa Kaini.

¹¹² Lōli keta abiyīsye kangi abólólo. Pala po bulipo u busyūke kangi bwāko. O, asayigwege u Ngamu ya Ntwa! Mwaketa lēlo umwe. Ketesya.

. . . umwēne ālintēndíke umwēne *gwakilingo gwa findu fyosa, mwa umwēne mōpe umwēne átēndíke ifisu;*

Ywani uyu átēndíke ikīsu kya pasi? Kristi. “Kristi átēndíke ikīsu iki?” Ena, nkulumba. Unko uswe tubūke itolo panini pankyēni.

Yūyo ukuya bwēlu bwa lwīmíko bwāke, kangi kifwāne kyakulingāna ikya buyepo bwāke. . .

Ubwēlu bwa lwīmíko lwa Ywāni? Lwīmíko lwa Kyāla. Ikifwāni kyakulīngānia kya Buyepo bwa Ywāni? Bwa Kyāla. O, une nkiganiile iki!

. . . pamo *ikifwāni kyakulīngānia kya būndu bwāke, kangi ukukoleléla mmwānya ifindu fyōso fya losyu. . .*

Mwaketa lēlo umwe. I Lisyu, ili likukoleléla mmwanya ifindu fyōsa. Yeso āyobíle, mwa Matai 24, “Mmianya ni kīsu fisakumalika, lōli a Masyu Gāngu gatisakumalikámo siku.” Umwēne ikukoleléla mmwanya ifindu fyōsa.

113 Sayansi ikugela ukugwīsyā pāsī Ilyēne, nukuyoba, “Ilyēne lyo i Būku ilyaiyolo. Ilyēne lisanusigwe.”

114 Kyōpe i kipānga kya Katolika gwa Roma, Bishopu Sheen āyōbīle, “Lila lisanusigwe kana pamo kahano utubalilo utukindanekindane, kangī fikayako fingi ku Lyēne mma. Ugwe ukābagīle ukwitūgasya ukwisila mu Lyēne linga ugwa gwafimbilisigwāga ukubōmba.” Loli Umwene ikukolekēla mmwanya ifindu fyōsa ukwisila mu Lisyu Lyāke. Amenī. Ikyo kyo iki une ngwinogona isya Ilyene. Une ngwitika i Bāngēli.

*... illyu lwa maka gāke, (galimo amaka mu Lisyu),
akabalilo kāko alibikīle mwēne ukusukukīgwa imbībi
syītu, ... (keta apa) ... itugesye ku kiboko ikililo kya
Luyīndīko ku mwanya;*

115 Ngimba Pauli ikugela ukubomba fiki? Umwēne ikugela ukunāngīsyā ukuti Kyāla āli nukufūmbwa pa fīndu fyōsa mwa Kristi, kangī Kristi āli kifwana kyakulīngania kya Kyāla. Untu gōsa ugu gusyēle gukubōmbēla na mūmo fikuti Umwēne āli pamwanyapo ukukīnda a Bāndūmi, pamwanyapo ukukīnda amaka gōsa. Abāndūmi bammwiputāga Umwēne. Pauli āgelāga ukunkūsyā Umwēne.

116 Lilino, une ngulōnda ukugela...Linga une ngutoligwa ukubūka pabutalipo ukukīnda iki, gosa ugu gusyēle gukunkūsyā itolo Kristi. Iki Pauli ikuyoba pa bwa apa, ngati mu ntu gwa 11, kangī fyōsa ifya kuyoba isya kīsu. Umwene alinkuti, “Ngimba u—u Gwandumi yula aabombile fiki, ‘Ugwe gwe Mwanundumiana Gwangu, ilisiku ili Une ngupāpīle Ugwe?’ Muketile?”

117 “Kubumalikisyo bwa kisu, abene bisakupyutigwa. Ikīsu kisakupyūtīgwa. Lōli i...Kangī ifindu fyōsa ifya kīsa fisakupyūtīgwa. Umwēne ābagīle ukufiniēmba ifyēne bo myānda. Ifyēne fikuyaga fyaiyolo, nukusanusigwa, nukukīnda ukusōkāpo. ‘Lōli Ugwe kusyāla. Ugwe kusyāla bwilanabwila. Ugwe gwe Mwanundumiana Gwāngu. Ilisiku ili Une ngupāpīle Ugwe, kangī utisakupyūtīgwāmo siku, ukwitūgāsyā ku kiboko ikitalusye ikya Luyīndīko.’”

Ngimba *ikiboko ikililo* kokuti fiki? Komma, Kyāla ali ni kiboko ikililo iki yumo ikwitūgāsyāpo pa kyēne. *Ikiboko ikililo* kokuti a “maka na bulagili,” ali nabo ubulagili bwa kilikyōsa m’Mwanya na nkīsu. Kangī i Myānya gyōsa ni kīsu fitēndékīgwe nu Mwēne.

118 Lilino, Ngimba yo Ywāne u Miāna unkululumba uyu, u Mwinitu unkulumba uyu, Kristi? Apa, Kyāla mwa Tāta, Mwanundumiana, kangī Mbepo Mwikemo, ikyēne kikaya... Ikyēne bo butatu, lōli Ikyēne bukaya butatu bwa bāndu. Ikyēne bo butatu bwa mbubombelambombo, bwa Kyāla yumoywēne ntiga.

119 Umwēne āli Tāta ikulōngosya abāna ba Israeli. Mula mwāli mbubōmbelambombo Bwāke, u nkulūmba Yehova Tāta. Kangi Umwēne ālitūgésya pa kīsu, ikukōlélígwa Mwanundumiana. Kangi lilino Umwēne ikwitūgásya mu Kipānga Kyāke, ikukōlélígwa Mbepo Mwikémo. Komma a Bakyala batatu; Kyāla yumoywēne ntiga mbubōmbélambomb mutatu: Tāta, Mwanundumiana, kangi Mbepo Mwikémo.

Abāndu bikugela ukuténdeka Umwēne ukuya Bakyāla batatu, Kyāla Tāta. Iyo yo nongwa, abaYuda, ugwe ukabagilámo siku, ugwe utisakutwalámo siku iki kwa nJuda, umma, kila pala. Umwēne akabagíla. Umwēne alinalo ulukomelesyo, ukuti, “Une ne Kyāla Yumoywēne.” Alipo itolo Kyāla yumoywēne ntiga.

120 Mu Africa abēne bikōsya injila itatu ingindane: abēne bikōsya kamokēne kwa Tāta, kangi kamokēne kwa Mwanundumiana, kangi kamokene kwa Mbepo Mwikémo. Aba Apostolic Faith mission, abēne bikōsya katatu, kisyo kunkyēne, ku bufwe Bwāke. Iki abēne bikukikōléla Full Gospel ku Kiloboko Kyakubwingililo, pamo ku Kiloboko Kyakubusōkelo, bikōsya katatu kubwakunyuma, bāyobíle Umwēne...ku busyílígwe Bwāke.

Kangi umwene aatile, “Akabalilo kako Umwene afwege, Umwene āgwíle kunkyēni.”

121 Uyungi āyobíle, “Gúlíla. Ugwe kufimbilisígwa ukusyíla u mūndu pa nyuma yāke.” Itolo ifindu fyabumang’anyi ifinini ifyaiyolo, napāpo, abēne bosa-babili basobi; bosa-babili basobi, ukufwana ni Lisimbo.

Iki yo Urimu Thumimu. Ikyene kikumasya ikyēne.

122 Lilino, apa, unko uswe itolo tukyēnesya mōsa nukukēta iki—iki ikyēne kikubonekéla, ikilo iki. Apa ikyēne kilipo, linga umwe mukulōnda ukukibona ikyēne. Mu fyosa fya kifuki fyínja malongo-mabili-na-fihano une njíle ndumbilili, une nkifūndíle ikyo. Kangi une kingikingi nswígíle ku fikūngílwa nkipānga. Ngimba ifikūngílwa fila fyo fiki? Ubusololi, ukuyoba mu ndimi, ukusanusya kwa ndimi, ubusetuli Bwanwakyala, na fyōsa bo ifyo, ifi fyōsa fikwísíla mwa Kristi.

123 Lilino kēta. Kristi yo Ntu gwa findu fyōsa. Kangi Umwēne yo Ntu gwa Kipānga. Kangi ngimba umwe mukétílémó siku i diamondi ilinywāmu? Ilikulumba ilinywāmu idiamondi ili limotolígwe kanunu, ilyēne lilinato utumotoke utunini tumōtwikéko ukufuma ku lyēne, ukumotokáko ukufuma ku lyēne. Ikyo kikuténdeka i diamondi ilitalusye. Ngimba akamotoke ka fiki? Ili diamondi ilyānalóli, injila yīyo ilyēne likwísíla pānja, ilyēne likubulígwe; ilidiamondi lyanaloli, akabalilo kāko ilyēne lyāgígwe.

Une nāli ku Kimberley. Umwe, mwe bingi ba umer, mwe mupilike umwe mubagile ukusala ilidiamondi ndukīndi, ikyo kyo kitalusye. Billy na une, na Tata. Bosworth. U presedenti

gwa migodi gya diamondi gya ku Kimberley, ikwēga... Umwēne āli ndongola-buyo gwāngu mu lukomano kula. Kangi abēne bātwwēgīle uswe kula. Kangi itolo ukufuma mu... Abēne bikufukula agēne pānja, o, kifuki amafiti elifu yumo na bamia bahano na babili pāsi pa kīsu. Agēne gikusōka pānja, ibwe lya bluu, bluu unywāmu, ngati ili ibwe-lyabluu umwe mukulyāga ukusyūngutila apa. Kangi abenekaya bala, abēne bikubabika abēne amafiti elifu yumo na bamia bahano na mabili, ukufukula agēne, ukukyūnga untengo uyege mmwanya. Ugwe gwābagīle ukubūku ku kisoko kula, abēne bakifugatīle na basikali ikyēne ku mamailosi bamia. Ega indóbo ibili isya magaloni mabili, umwēne alinkuyoba, nukupīmba iyēne yīswīle nu—nu nsānga, kangi linga ugwe gwābagīle ukufika kukāya nu gwēne, ugwe ubagīle ukuya gwamamiliyoni, gisakuyāga ngamo amadiamondi mīngi fiyo mu gwēne. Lōli abēne babagīle ukubōmba nukufukula agēne, ukubīka untēngo pamwanya pa gēne.

¹²⁴ Lilino, i diamondi, akabalilo kāko ilyēne likusōka pānja, ilyēne lyo itolo linywāmu, litenenefu, lyakusyungutila, ngati, kipatu kya ndalasi. Lilipo i diamondi ilyabluu, i diamondi ilititu, emeradi, kangi i diamondi ilipelelesye, diamondi ilyēlu. Lōli akabalilo kāko ilyēne likusōka panja... Polelo akabalilo kāko ilyēne likutēndekīgwa nukubīgīgwa mbubōmbélo, kalipo akayabo i diamondi lila likufīmbilisīgwa ukutāgako. Kangi ilyēne likufīmbilisīgwa ukutaga i—i ifibulutuke fya ilyēne. Ukubālula utubulutuke utunini, panongwa yakuti, akabalilo kāko ilyēne likwisa mu bwēlu ubwakatalula, bo *ulu*, ilyēne likupela ukumulika. Akapatu, aka ko kakupela ukumulikamulika, mūmo akēne katumuliligwe. Akēne katumuligwe, kapātuligwe, kangi polelo, akabalilo kāko akēne kakubōmba, akēne kakutēndéka ulumulikamulika. Kangi kamo kikubūka ubwēlu ugwāndeka, akāngi kikubūkāga ubwēlu bwa bluu, kangi lumo akāngi, ubwēlu bwa emeradi, kangi ubwēlu ubukesefu. Kangi utubwēlu utukīndānekīndāne tukubūka ukufuma ku lyēne, ukufwana kipingafula. Abēne bikulikōléle ilyēne, “moto mu diamondi.”

¹²⁵ Lilino, lumo mwa imuli sili lukwīmilīla ifikūngīlwa. Lōli ikyēne kyo, kyēne, Kristi yo Diamondi. Kangi Umwēne āli yo Yūmo Yuyo ālisīle, kangi ākuyubuligwe, nukufulasīgwa, nukukomīgwa, ukuti Umwēne abāgīle ukwīndalīka Mwēne kunyuma ukuya Bwēlu ku kīsu. Umwēne yo Fundi Diamondi.

¹²⁶ Ngimba umwe mubagīle ukwinogonela, bo kukāli nukuya i kīsu, bo kukāli ukuyako ubwēlu, bo kukāli ukuyako i ndōndwa, bo kukāli ukuyako kalikōsa? Kwālīko i Nyībūko ingulumba yikusōka, iya Mbepo, kangi ukufuma ku Nyībūko iyi mulinkwisa ulupelelesye ukukīnda ulwa ulugāno, 'nongwa yakuti kakalipo nakamo ukuti ulwēne lwīse ukufuma ku yīla lōli ulugāno. Lilino, uswe, iki uswe tukukikōléla lugāno, umwīsyūgu, lo lugano

uluniongasye. Lōli itolo bo uswe tukwāgamo ifyakulōndígwa, pamo akapatu kanini ka lugáno lula mwa uswe, ulwēne lukwāndusya aminogonelo gītu gōsa.

¹²⁷ Polelo ukufuma mu yila kukwīsa akasōko akāngi, ukufuma ku Nyībúko inywāmu iyi, i Diamondi, kangi ikyēne kyākōleligwāga bugolofu, bwanaloli ubugolofu. Lilino, iyo yo nongwa uswe twābagīle ukuya ne lulagīlo. Iyo yo nōngwa ululagīlo lubagīle ukuya nu bulongi. Linga nabumo ubulongi bukukōnga ululagīlo, ululagīlo lutikubōmba nakanunu nakamo. Kangi akabalilo kāko ubulongi bwātumulígwa nu lulagīlo, iki kikutwāla ubufwe, kangi akayapo nayumo yuyo ābagīle ukuhōmba ulufūndo lōli Kyāla Mwēne. Kangi Umwēne āhōmbile ulufūndo lwa bufwe bwītu, kangi ālyēgīle imbībi syītu pa Mwēne, ukuti uswe tubagile ukuya bwikemo bwa Kyāla ukwisila mwa Umwēne.

¹²⁸ Lilino, akabalilo kāko aMabwelu amakulumba aga galinkusōka, pamo imulimuli ingulumba isya Mbepo: lugano, lutēngáno, ubo bo bōsa bwāliko, Bula. Kukālilo nakumo ukukubilwa. Kukāliko nalumo—nalumo ulubēngo, pamo nakamo akabini; akēne kakābagīle ukufuma mu Nyībúko iyi. Yula ali yo Yehova. Yula ali yo Yehova Kyāla. Kangi lilino, bo mūmo abafundakyāla bikukikōléla ikyēne, u theofani alinkubūka ukufuma Yila, iki kikukōléligwa mu Fyammāsīmo, u “Logos,” u Logos uyu ābūkīle ukufuma kwa Kyāla. Ikyēne kikafu ukulīngánia, lōli Umwēne āli kiyabo kya Kyāla.

¹²⁹ Lilino, apa kyo iki kyāboníke. O! Nhobokela une. Une—une—une itolo ngufika pa iki, iki itolo kikunyēga une palapala une ngukigana ikyēne. Muketile? U Logos, kangi i Nyībúko ingulumba iyi, i Nyībúko ya Mbepo ingulumba iyi iyi yikāli nu bwāndílo nabumo pamo ubumalikisyo nabumo; u Mbepo unkulumba uyu alinkwānda ukwībūmba, kangi u Logos uyu ābūkīli panja ukufuma ku Yēne āli yo Mwanundumiana gwa Kyāla. Iyēne yāli yo bubūmbe bwēne ububoneke ubu Mbepo āli nabo. Kangi Iyēne yāli theofani, iki kokuti u mbili, kangi u mbili gwāli ngati nnyāmbāla.

¹³⁰ Mōse ākibwēne Ikyēne akabalilo kāko Ikyēne kyākīlénie ukukīnda i...kifuki—kifuki īlyalábwe. Kangi umwēne ākibwēne Ikyēne, alinkuyoba, “Ikyēne kyābonekága bo kiyabo kya kunyuma ya mūndu.”

Ugwe go luko lulalula lwa mbili ugu uswe tukwāmbilíla akabalilo kāko uswe tukufwa apa. “Linga ikitēmbē ikyamfu iki kisungulwíke, uswe tulinakyo kimo kitalile kikugūlílá.” Ikyo kyāli Ikyēne. Kangi uyo theofani uyu yo āli Mwanundumiana gwa Kyāla. Yūla Mwanundumiana, yula Logos, alinkuya mbili, panongwa yakuti uswe twābīkígwe mu mbili. Kangi u theofani, u Logos, alinkuya mbili, apa pakati pītu, kangi Ikyēne kikāli nakimo ikingi lōli ubuyo bwākwitugasyāmo, kabuno i Nyībúko

yōsa yītūgasyága mu Mwene. O, ngimba umwe mukukiketa ikylene? Pala Ikyene kilipo. Ikyo kyāli Yumo, ukuti, mwa . . .

¹³¹ Keta kuno. Unko uswe tusanuke lilino nakalingo itolo ku Bahiburi, untu gwa 7, itolo pa kabalilo ka—ka līpyána, Kyāla ukuya mwīgáne. Unko uswe tukēte iki ikyēne kikuboneka ngati apa. Abraham!

Ngimba ko kabalilo kalinga aka uswe tulinako? Uswe tulinago amaminiti kalongo. Umma ndaga. Uswe tubagile ukukóla iki, polelo uswe tukumālísya ikyēne mōsa ilikōnga, ilikōnge, pamo Pandungu, u Ntwa ikwiganága.

¹³² Abraham āgomokelága ukufuma ku bupyūte bwa mwalafyāle.

Kabuno u Melekisedeki uyu, mwalafyāle gwa Salemu, . . .

Balinga aba bamenye kūko, yūyo, iki Salemu āli? Yerusalemu.

. . . mwalafyāle gwa Salemu, unsōka gwa Kyala ugwapamwanya ukukinda, yuyo ālyāgéne na Abraham ikugomokáko ukufuma ku bupyūte bwa banyafyāle, nukunsaya umwēne;

Pilikisya.

Kwa yūyo yōpe Abraham ikupa ikiyabo kya kalongo kya fyōsa; ikyākwannda ukuya mu kusanusya u Mwalafyāle gwa bugolofu, . . . ukufuma yula yōpe u Mwalafyāle gwa Salemu, uyu yo Mwalafyāle gwa lutēngáno;

Kisita tāta, kisita mama, kisita kikolo, ukuya nabo nabumo ubwāndilo bwa masiku, pamo ukumālísya kwa būmi; . . .

¹³³ U Mwalafyāle isile pāsi ukufuma ku Salemu, nukwāgána na Abraham ikufuma ku bupyūte bwa banyafyāle. Kangi u Mwalafyāle uyu akāli nayo nayumo ugwīse, akāli nayo u māma nayumo, akāli nabo ubwāndilo bwa masiku, pamo ubumalikisyo bwa masiku. Ngimba yo ywāni uyu Abraham ālyāgéne nayo? Lilino inogona. Umwēne akāli nayo ugwīse nayumo. Umwēne akāli nayo u māma nayumo. Umwēne akālímó siku na kabalilo aka Umwēne ālyāndíle, kangi Umwēne akālímó siku na kabalilo aka Umwēne isakumalikága, mwakuti yulayula u Mwalafyāle gwa Salemu abagile ukuya ali nu bumi umwīsyúgu. Amení. Umwe mukukibona ikyēne? Ikyēne kyāli yula theofani yula āli yula Mwanundumiana gwa Kyāla. Salemu nki? Yula u Yerusalemu uyu ali Mmwanya, yula Abraham, ukuya āsayígwe, ālōndesyága, ukukāga, ukugela ukukāga a Kāya kāko u Njengi nu Mtēndeki āli Kyāla. Umwene balinkubēla mfipapafyang’osi na mfipapafyambene, kulikosa, nubilōnda, ukubēla, kangi ālōndesyága a Kāya kāko u Njengi nu Ntēndeki āli Kyāla. Kangi

umwēne ālyāgéne nu Mwalafyāle gwa Salemu yula, ikusuluka pāsi, kangi umwēne ālinhōmbíle Umwēne ikyakalongo kya fyōsa ifikabígwe ku bwíte. Ameni. Uyo yo Mwene. O, Nkundwe Graham, yula āli Mwēne. Yula āli yo Mwene.

Abraham ālimbwēne Umwēne kangi. Iisiku limo umwene ālitūgéseye nkihema mula. Umwene alinkukēta, ukwīsa pala, kangi umwene alinkubabona abanyambala batatu bikwisa.

¹³⁴ Umwe mumenye, kalipo akandukamo itolo ka Unkristi, ukuti umwene ikumanya Mbepo akabalilo kako umwene ikuketa Ikyēne. Akabalilo kāko umwēne...Umwēne itolo ikumanya ikyēne. Kilipo itolo ikindukimo Kyammasimbo ukufwana ni kyēne. Ifindu Fyammasimbo fikuketeligwa-ngāni Mwamasimbo. Umwe mumenye. Ena, umwene abagile itolo ukukimanya ikyene, linga umwene yo naloliloli apapigwe. “Ing’osi Syangu simenye a Masyu Gangu.”

¹³⁵ Kangi umwene itolo āménye ukuti ikindukimo kyālipi. Umwene alinkubopa panja, kangi umwene alinkuti, “Isaga nkati, Ntwa. Itūgasya pasi. Ima panini. Une ngwegaga ikimomosela kya nkati nukubīka nkiboko Kyāko. Une nisakusukága amalundi Gāko. Itūsyā Gwimwēne, polelo kindililága pa njila Yāko, kabuno Ugwe—Ugwe gwīsíle ukunjātíla une.” Mmwānya nkīsu ikisitamboto, ukwēga injila ingafu, injila na bapikígwe banāndi ba Ntwa.

Akabalilo kāko, Loti itūgasyága mbukabi, umwīpwa pāsi pala, lōli umwēne itūgasyága mbutulwanongwa. Ikyo kyo iki ubukabi bwīngi bukutwāla bo butulwanongwa.

¹³⁶ Popāpo Abraham alinkubatwāla Abēne pala, bo umwēne ikwēga utwīsi utunini nukōsyā amalundi Gābo. Umwēne alinkubopela pānja mu ngwāta, nukwakwēga i ngwāta indupano mu ntimo, nukuyigoga iyēne; ukupa iyēne ku gwambombo, ukutēdekésya. Kangi alinkuti, “Sarah, kanya ubufu bwāko.”

Umwe mumenye iki ukukanya, ikyēne kili, kikusanusyā. Umwe mumenye, māma ālisibíle ukuya ni kyaiyolo, uluko lwa ngati katapwa, umwēne āli nako nkati mu—u bufu nkitundu. Ngimba umwe mukibwēmo siku ikyēne mu sēfa? Kangi ugwe gwāli na katapwa nkati mula, ugwe gwayigaga ubufu bula, umwe mumenye; nukufika ubusito bo *ulu*, nukuyíga ikyēne mōsa, ngati. Une numbwēne māma ikubōmba ikyēne, utubalilo twīngi, akatapwa, ukuya na kandu akanini akasyungutíle aka kali ni sefa ya tusāmbō innin pa kēne. Umwēne egaga ubufu bula pala nukusēfa ubwēne bo *ulo*, umwe mumenye, ukukung’unda kunyuma na nkyēni, bo *ulo*. Polelo kwēga akatapwa nukuyiga akēne ukusyūngutíla, bo *ulo*, ukubutwāla ubwēne pāsi. Kangi ako ko kabalilo kāko uswe tukubūkága pāsi nukwēga ubufu busígwe ku kigayo kya filōmbe ikyaiyolo; kangi isīnde inywāmu isyaiyolo, umwe mumenye, syāpelága unkatu gwanaloliloli gwa

filombe. Ugwe gwabagile ukukekela ifisinga ilisiku lyōsa pa yēne.

¹³⁷ Polelo lēlo, alinkuti, “Kanya ubufu ubunini, itolo nakalinga. Kangi tēndēka utusyēsye tumo papapa apa pa mafiga, papapa nakalinga.” Kangi abēne balinkukāma ing’ombe nukwagako ulupyu lumo. Kangi abēne balinkulwēga, ukulufuluga ulwēne, nukwagāko ulukēta lumo. Kangi polelo abēne balinkubūka nukwakugoga ingwāta nukwakwēgako inyama yimo, kangi abēne balinkukalanga inyama. Balinkwēga ulupyu ululufu, unkati gwafilōmbe, kangi abēne balinkwēga uluketa lumo ukubika pa kisyesye ikipyāno. O, ikyo kyo nalololi kinunu. Kangi abēne batyēkāga ulwēne lōsa pamwanya pala. Kangi umwēne alinkukyēga ikyēne pānja, kangi ukukibika ikyēne pāsi ku Banyāmbala batatu aba.

¹³⁸ Kangi bo Abene bālyāga, Abene balinkūmilīsyā ukuketesya kubwa ku Sodomu. Kangi ukukīndapo akabalilo, Abēne balinkusumuka kangi balinkwānda ukusōkāpo. Kangi Umwene alinkuti, “Abraham. . .” Alinkuti, “Ugwe utisakufisāga ikyene ukufuma kwa une.”

¹³⁹ “Une ngabagila ukukifisa ukufuma kwa ugwe iki une nguya pakubōmba. Une ngubūka ukusuluka kula. Imbibi sya Sodomu sisīle mu mbulukutu Yāngu.”

Ngimba āli ywāni u Nyāmbāla? Ulufūmbi mmyēnda Gyāke mōsa, nukwitūgasya pala ikulya unnyofu gwa ngwāta yimo, nukunwa ulupyu lwa ng’ombe, nukulya ikisyesye kya nkati gwa filōmbe, kangi uluketa lumo. Yo ywāne u Mwinitu uyu unhesya? Babili, pamo batatu ba Abene, nitūgēsye pala. Ulufumbi mōsa mu myēnda Gyāke. O, ena, “Uswe tufumile ku Kisu kyākubutāli.” Ena, kubutali fiyo. Kangi popāpo Umwene alinkuyoba. . . Ena, bāli Bāni ngimba Abēne?

¹⁴⁰ Umwene alinkuti, “Une ngabagila ukufisa kwa Abraham, ukuketa ukuti umwene yo gwakilingo gwa kisu kyapasi.” Ameni. “Une ngusetula isyakubutītu Syāngu,” mmasyu agāngi, “ku bala bābo bo bākilingo ba kisu kyapāsi.” Ikyo kyo kuko i Kipanga kikulōndígwa ukuya umwisyugu. Uko ko kutalusya. Ukukaba i Fyakubutītu fya Kyāla, ukumanya akīkolélo gwīmwēne, nu kubōmba, na ikyākubōmba, na kēndelo, na kītūgasyīlo. Uswe twe kilingo kya kīsu kya pasi. Kutalusya. Umwene ikusetula Ikyene kwa ugwe, panongwa yakuti Umwene atisakufisa nakimo kunyuma. Iyo yo nongwa uswe tukukētēsya ifindu ifi fikwisa ukubonekāko.

Ikīsu kikuyoba, “Aa, ikyo kyo kipāmba kya būmilīsi.” Baleke abene bayobege ikyene. U gwakilingo gwa kisu kyapasi amenye ifindu ifi. [Ubuyo busitakandu pa tepi—Nsimbi.]

. . . kabuno abene bisakukoleligwaga bāna ba Kyala.

Basayigwa abēne aba bo bōlōlo: kabuno abene bisakwingilapo pa kisu.

Umwēne ikutēndēka isyakubutītu Syāke simanyigwége ku bēne, ikusetula isyēne ku bēne, ukubanāngisya abēne ikyakubōmba na kītūgasyilo, ukupīka ifindu ifya kīsu kya pāsi; ukwēnda mbunyakyāla nukwītūgāsya mbunyakyāla, nkīsu ikyāmwīsyūgu iki, ukwēnda mulamula nu Mwēne. Kileka ikisu kiyobege iki abene bikulonda ukuyoba.

141 Polelo Umwene alinkuti, “Une ngabagila ukufisa ikyakubutītu iki kwa Abraham, panongwa yakuti, ukukēta umwēne yo gwakilingo gwa kisu kyapasi. Loli,” Umwene alinkuti, “Une ngusuluka pāsi ukwakubongotola Sodomu. Une ngusuluka.”

142 “Ngimba ugwe kubombaga fiki, Nkulumba? Ngimba ukufumila kūgu? Ngimba ikyēne kyo kyafiki?”

143 Isaga ukusyagania, Umwene āyobīle, “Kangi ikindu ikingi, Abrahamu, ugwe ugūlile ifyinja malongo-mabili-na-fihano pa lufingo ulu Une ngupēle ugwe. Ugwe ubōmbīle ukētēsīsyē mōsa, i—i nyapini na filifyōsa, panongwa ya mwāna uyu, ifyinja malongo-mabili-na-fihano ifi fikindilēpo. Ugwe ukāli kugūlila pa Une. Lilino Une ngwisakukuyātīla ugwe, itolo kifuki akabalilo ka būmi, ukufwāna, kabalilo ka būmi, umwēsi ugu gukwīsa Une nisakuyaga na ugwe.”

144 Kangi Sarah, kunyuma mu kihema. Kangi u Nnyāmbāla uyu inyuma Yake yisanukīle ku kihema, ikuyoba kwa Abraham, bo ulu. Kangi Sarah alinkubūka, “Ha!”

145 Umwēne alinkuti, “Ngimba fyo fiki fintēndīke Sarah ukuseka?” Ho-ho-ho! Ngimba bule isya ikyo? Kila kyāli kukwābila-patalu kumo, bule ikyēne? “Ngimba kyo fiki kintēndīke Sarah ukuseka?”

Sarah alinkuti, “Umma. Une ngasekāmo siku.”

146 Alinkuti, “O, ena, ugwe ubōmbīle.” Umwēne ātīlāga. Umwēne ātetemāga. Yula āli Ywāno, ābagile ukumanya iki umwēne ābōmbāga kunyuma ku kihēmba? Yula yo Yula yulayula Kyāla uyu yo ali na uswe umwīsyūgu. Yulayula Yula. Umwēne ikumanya fyōsa ifya ikyēne. Muketile? Umwēne ikusetula itolo ikyēne mūmu ugwe ufūmbilwe. Muketile?

147 “Ngimba fiki ifi ugwe kuseka?” Muketile, inyuma Yāke yīsīndēme ku kyēne. Ili Bāngēli lyāyobīle ikyo, ukuti, “Inyuma Yāke yāsīndēme ku kihēma.” Loli, Umwene amenye ikyene. “Ngimba umwene fiki, kunyuma kula, ikubōmba *iki*?” Umwe muketile? Polelo, Umwēne alinkuti, “Une gwisa ukukuyatila ugwe.”

148 Yo ywāni u Mwinitu unhesya uyu? Umwe mumenye iki kyābonīke? Umwēne alinkwēnda itolo panja pala nukuyōnga. Kangi i Bāngēli lyāyobīle ukuti Yula āli Kyāla Mwenemaka, Yehova, yila ingulumba i Nyībūko, yula u Theofani, yula Logos.

149 Undumbilili yumo āyobile kwa une, akabalilo kamo aka kakindilepo, alinkuti, “Nkundwe Branham, ugwe ukabila ukwinogona ukuti yula āli Kyāla, bule ugwe?”

150 Une ndinkuti, “Ili Bāngeli lyo liyobile Ikyo kyāli Kyāla, Elohim.” Iki, Umwēne āli Kyāla Mwenemaka, u El Shaddai, uko ko kotalusya, u Mpa-Maka, u Mwikutisi. Ameni.

151 O, une ngwipilika ubwiputiputi! Inogona isya ikyene. Apa alipo, Umwene ali. Lilno une nguyaga pakubanāngīsyā umwe Umwēne yo Ywāni ali apa, polelo umwe mwisakumbonāga yo Ywāni u Mwanundumiana. Yula āli Yeso, bo Umwene akāli ukuya ni Ngamu ya būndu, “Yeso.”

152 Ālīmīle pala pa nyībúko ilisiku lila. Kangi abēne bōsa banwāga, umwe mumenye, kangi, “Ukuya na mīsi gāli mu lulangalanga,” ni fīndu bo ifyo. Umwene alinkuti. . . Abene bālyāga a manna ni fīndu. Abene balinkuti, “Aba tāta bītu bālile a manna ndulanga, ku fyiinja malongo mana.”

153 Umwene alinkuti, “Kangi abene, aligwēsa, bafwile.” Alinkuti, “Une ne Nkati gwa Būmi ugu gukufuma kwa Kyāla, ukufuma ku Mwanya. Umwēne uyu ikulya u Nkati ugu atisakufwāmo siku.”

154 Balinkuti, “Mulimosa, aba tāta bītu bānwīle ukufuma kwa Mbepo, ukufuma ku i Lyalabwe lyamwambepo ili lyāli ndulangalanga, ili lyabakōngāga abēne.”

155 Umwene alinkuti, “Une ne Ilyalabwe lila.” Lwimiko! Yohani Mwikemo, untu gwa 6.

“Fiki,” abene balinkuti, “fiki?”

“Ena. Uko ko kotalusya.”

156 “Nongwa ya fiki,” umwēne alinkuyoba, “Ugwe guli. . . Ugwe ukaya ni fyiinja malongo mahano mbukusi.” Ena, imbombo Yāke yālimpelīle Umwēne ukuboneka nkāngalēpo panini, lōli Umwēne āli itolo malongo matatu. Alinkuti, “Ugwe gwe nnyāmbala ukakīnda ni fyiinja malongo mahano mbukusi, kangi ugwe kuyoba ukuti ugwe umbwene Abraham, uyu afwīle ku fyiinja bamia lwēle pamo lwēle ya yumo? Uswe tumenye lilino ukuti ugwe gwe mōhēsi.”

157 Umwene alinkuti, “Bo Abrahamu akāli ukuya, UNE YONE.” Pala Umwene ali. Ngimba ali yo ywāni UNE YONE? I Ngamu yakukīndilila ya ku ngulilo syōsa. Yula āli yo. . . Mbanda ya Moto yila nkati mu lusingi ulwakamoto, “UNE YONE UYU UNE YONE.” Pala Umwēne ālipo, yula u Theofani Umwēne ātēndīke apa, kikukōlēlīgwa Mwanundumiana gwa Kyāla, u UNE YONE, u Yehova.

158 Tomasi āyobīle, “Ntwa, tunānagīsyā uswe u Tāta kangi ikyēne kisakutwikutisyāga uswe.”

159 Alinkuti, “Une ndi na ugwe akabalilo katali fiyo, ugwe ukampanya Une?” Alinkuti, “Akabalilo kako ugwe kumbona Une, ugwe umbwēne u Tata. Fiki ikuyoba, ‘Tunāngísyā uswe, Ugwe, u Tata’? Une na Tata tuli Yumo. Tata Gwangu ikwitūgásya mwa Une. Une ne itolo kitēmba kikukólégwa Mwanundumiana. U Tāta ikwtūgásya mwa Une. Ngaya yo Une uyu ikubomba imbombo isi, ikyēne yo Tāta Gwāngu uyu ikwitūgasya mwa Une. Umwene yo ikubombo imbombo, komma Une.”

160 Lilino, ukwīma kunyuma kula, kangi, Mōse alimbwēne Umwēne, ikiyabo kya kunyuma ikya Umwēne, alinkuti, “Kyāboníke ngati kunyuma ya nnyāmbála,” u Logos uyu ābūkile ukufuma kwa Kyāla.

161 Polelo kyo fiki kyāboníke? Uyu āli Kyāla. Kangi inongwa Umwēne āyīle ukufuma ku Logos ukubūka ku mbili. . . Iki. . . ? Ngimba ugwe bulebule. . . ? Ngimba fiki kyāboníke ku ikyo? Amaminiti mahano bi kikāli ikyo, Umwēne āli. . . Umwēne āli yo Logos. Lōli ngimba abōmbīle fiki Umwēne? Umwēne āfikīle itolo kula. . .

162 Lilino, imibili gyītu gibūmbígwe ukufuma ku tumbakasya kalongo na tuhano na kamokene ifya kīsu. Uswe tumenye ikyo. Ugwēne gubūmbígwe ukufuma ku potashi, kangi—kangi i—kangi u kalisiumu unnini, kangi—kangi u petulolo, kangi ubwēlu bwa mmwanya, na ma atomu, na fyosa bo ifyo. Fyōsa ukubunganisígwa palikimo, kangi kikutēndéka umbili ugu, kikufuma ku lufūmbi lwa kīsu. Ugwe kulya ifyākulya. Bo ugwe kulya ifyākulya, ikyo kikwānduka ukubūka mu. . . ukufuma ku lufūmbi kangi ikyēne kikufuma ku lufūmbi, kangi ikyēne itolo—itolo kikukīndilíla mulamula nkyēni. Umbili gwāko, na mūmo umbili gwāko guyīlīle, gukakīndanapo nu gwa falasi, pamo ukufuma i ng’ombe, pamo kalikōsa akāngi. Ikyēne kikāli itolo mbili.

163 Kangi, ndumiana, ugwe kumogesya u mbili; lōli umbepo yula ali nu mōyo nkati mula, nkundwe gwāngu. Uko ko kutalusya. Lōli umbili gwāko go itolo mfu gwa kīsu, ngati kinyamana. Umbili gwāko go gukaya gwakukīnda ikinyamana. Kangi linga ugwe kunyonywa pa mbili ni kīndu ugwe kukikēta, kunyonywa abakīkūlu, kunyonywa ifindu fyōsa ifi ifikīndānekīndāne, ikyene pōpe kyo kinyamana. Uko ko kutalusya. Uko ko kutalusya. Ugwe ulingabōmbāga ikyene. U Mbepo gwa Kyāla isakukulongolelága ugwe nkyēni nukukubīka ugwe pa buyo ubwapamwanyapo ukukīnda ikyo. Uko ko katikati kutalusya.

164 Lilino, kangi apa, uyu unkulumba u Theofani imile pala. Iki. . . Yula unkulumba Yehova Kyāla, ngimba umwe mumenye iki Umwēne āyobīle? Umwēne alinkufikila itolo kula nukwēga ulukufilwa ma atomu, alinkwēga ubwēlu ubunini, nukōneléla ubwēne mula, bo *ulu*, alinkubūka, “Whuu,” u mbili, kangi itolo alinkwitogāmo mulamula mu gwēne. Ikyo kyo kyōsa.

165 Alinkuti, “Isaga apa, Gabrieli,” yula u Gwāndúmi unkulumba. Alinkubūka, “Whuu.” “Itoga mu *ugo*.”

166 “Ugweisa apa, Mikaelo,” u Gwāndúmi ku kiboko Kyāke ikililo. “Whuu.” Panongwa ya . . . “Ugwe itoga mu *ugo*.”

167 Kyala, na Bāndúmi balili, apa mu mbili gwa bundu, kangi nukunwa ulupyu ukufuma ku ng’ombe ingolōmbe, ukulya uluketa ukufuma ku lupyu, nukulya unkatu gumo ugwa filōmbe, nukulya inyama ya ngwāta. Babili a Bāndúmi na Kyāla. Ili Bāngéli lyāyobīle lūlo. Uyo yo Melekisedeki, uyu Abraham ālyāgēne, ikufuma ku bugoge bwa banyafyāle. Uyo yo Mwanundumiana gwa Kyāla.

168 Kindililāga, apa mu Bahiburi, ugwa 7, alinkuti, “Lōli abūmbīgwe ndubātīko lwa ngati ku Mwanundumiana gwa Kyāla.” Pala Umwēne ali. Umwēne āpelile ifindu fyōsa mu Mwēne. Kangi Umwēne ālyēndīle palapala pānja pala, kangi itolo alinkwāndusya ulufūmbi lula itolo ukugomokela ku mfu kāngi, kangu ukwitogēla palapala ukugomokela ku Lwīmīko.

169 Kangi a Bāndúmi, nakalinga itolo bo bampokīle Loti na Nka. Loti, kangi umwēne alinkūmilīsyā ukukēta kunyuma. Umwene alinkuti, alinkubabula abene komma ikubōmba ikylene kangi. Kangi Abene balinkwitoga palapala ukugomokela nkati mu—mu Kuyapo kwa Kyala.

170 Lilino, lo lusūbīlo ulukulumba luki uswe tuli nalo mu Lwītiko ulukulumba ulu lūlo uswe tukubōmbela ikilo iki! U Kyāla gwābūmi, u Yehova, i Mbanda ya Mōto, ali na uswe. Ikwināngīsyā Mwēne mu maka, kangi mukubōmbabōmba, kangi ukukusya . . . Ukubītikīsyā abēne ukwēga i Pīcha ya Umwēne, u Yehova yulayula. U Mwanundumiana gwa Kyala uyu ālisīle ukufuma kwa Kyāla, āgomokīle kya Kyāla, kangi ukwitūgāsya mu Kipanga Kyake kwa bwilanabwila. Pala Umwene ali.

171 Umwēne ali ni ngamu syītu pa Būku Gwāke, nu lwītikano ululapīgwe nu Mwēne, kabuno akayako nayumo unkulumbapo Umwēne abagīle ukulapilapo, ukuti Umwene isakusyūsyāga uswe mmwanya mu lisiku lyabumalikisyo. “Umwēne uyu ikulya u Mbili Gwāngu, kangi ikunwa i Lilopa Lyāngu, ali nabo u Bumi ubusitakumalika, kangi Une nisakusyūsyāga umwēne mmwanya ku lisiku lwabumalikisyo. Umwēne uyu ikwīsa kwa Une, Une mu njila nayīmo ndisakuntāgāmo pānja. Umwene uyu ikupilika i Lisyu Lyāngu, kangi nukummwitika Umwene uyu ālindūmīle Une, ali nu Bumi ubusitakumalika, kangi atisakwisamo mu bulongi siku, loli akilenie ukufuma ku bufwe ukubuka ku Bumi.”

172 Yula yulayula Yūyo ābagīle itolo ukufikila nu kamata ulukufi lwa kalasiumu na potashi, ikubūka, “Whuu,” kangi pala ugwe uli kāngi. Kangi ingamu yāngu yili pa Būku Gwāke. Ho-ho! Ho-ho-ho-ho! Ngimba une ngupāsya fiku mūmo

ifibega fyāngu fikufika pakuniōngála, mūmo une ngukāngalíla? Naloliloli umma. Na kayabo ka lupasyo mma.

¹⁷³ Nkundwe Mike, limo mwa masiku aga, sayaga indumbula yāko, nkundwe, akabalilo káko ingangabwíte ingulumba yila yisakwísa, akōgo kala, kangí u Yosefu yula isakusōkelága panja. Haleluya! Umwēne isakuyobága, “Bāna!” “Whuu.” Pala pisakuya, tupēlígwe mbufwāne Bwāke; bakeke kwabwilanabwila, ubukāngále bukīndile; ububine, indamyo, i sulumanie siyōngíle. Lwīmiko luyege kwa Kyāla gwābūmi!

¹⁷⁴ Uyu yo Yuyo uyu ikuyobelamo, umwisyugu, Mwanundumiana Gwake. “Mu Tubalilo utukindanekindane mu njila ingindakindane Umwene āyobile ukwisila munsololi, loli mu lisiku ilyabumalikisyo ili ukwisila Mmwanundumiana Gwake, Kristi Yeso.” Umwēne ikuyoba ku ndumbula ya mūndu aligwēsa uyu Umwēne akōlīle. Linga ugwe gwipilikémo siku a Masyu Gāke pamo umpilike Umwēne ikukung’usya ku ndumbula yāko, ngulāmba komma ukusyūmbutuka ukusōkapo pa Kyēne.

Unko uswe twīpūte.

¹⁷⁵ Tāta Gwakumwanya, ikilo iki, pakuti uswe tusangalwíke fiyo ukumanya, ku bwīgulílo bwa Kalata gwa Bahiburi uyu, mūmo Pauli ābūkíle ukugomokela itolo mu Nongwainunu sila. Umwēne itolo akābagíle ukwēga ikyēne pa syakupilika-kubāndu pamo pa kyakumbonekela. Umwene alondaga uswe ukumanya iki kyāli Bwanaloli. Kangi umwēne ābūkíle kulakula kunyuma mu Nongwainunu sila, kangi umwēne... ukugomokela mu Lwítikáno Ulukúlu, i Nongwainunu iyi yālūmbililígwe ku bēne. Kangi umwēne alinkukēta, ukukīndámo mu Lwítikáno Ulukúlu kula, imisyūngúlu gyōsa ni fyākūmilila. Iyo yo nongwa uswe tuli nalyo i Buku ilikulumba ili ilya Bahiburi ikilo iki. Kangi uswe tukuketa Ikyene, Ntwa, kangi uswe tuliganile Ilyene. Kangi ukukīnda mu ngulilo, Ilyēne lyōkígwe, Ilyēne libalanisígwe, Ilyēne ligeligwe ukusōsigwápo, loli Umwene ikwēléla nkyēni itolo lulalula. Kabuno Ugwe uyobile, “Kumwanya na pasi fisakumalikaga, loli a Masyu Gangu gatisakumalika umma.”

¹⁷⁶ Polelo abīlamwa bābagíle ukuyoba, “Mulimosa, ugwe utile, ‘Pauli āsīmbole iki.’” Komma Pauli, lōli Kyāla uyu āli mwa Pauli; yula Kīndu ikipelafindu uyu āli nkati mwa Pauli.

¹⁷⁷ Mumo itolo āli mwa Davidi, akabalilo kako umwene āyobile, “Une ndisakwitikisya Umwikemo Gwangu Ntiga akētēge ububole, kangi ndisakundeka umoyo Gwake mu gehena.” Kangi u Mwanundumiana gwa Kyāla egile a Masyu gala ukufuma ku nsololi, kangi alinkubūka kulakula nkati mfipāmbaga fya gehena. Kangi alinkuti, “Bongotola pāsi ikitēme iki pāsi, kangi Une nisakukisyusya Ikyēme mmwanya mmasiku matatu.” Kangi Umwēne ābōmbíle ikyēne, panongwa yakuti i Lisyu Iya

Kyāla likabagīla ukutoligwa; na kapatu nakmokene kakabagīla ukutoligwa. Mumo uswe tukupalisya Kyala panongwa ya iki, uyu unkulumba Urimu Thumimu, kangi ukumanya ukuti ifyakutubonekela fyītu, Ntwa, fikumulika papapa pa i Bāngéli apa! Uswe tupāpígwe kangi, tuli na Mbepo Mwīkémó.

¹⁷⁸ Gwempala Kyāla, linga alipo unnyāmbála pamo unkíkúlu nkati muno ikilo iki, ndumiana pamo ndīndwána, yūyo akabīkilamo siku ubukēti iki, ngimba abene babagile bulebule ukusyuka mmwanya linga bukayamo u Būmi mula? O, abene bikuyoba, “Une ndinabo u Būmi.”

¹⁷⁹ Lōli i Bāngéli lyāyobīle, “Umwēne yūyo ikwitūgásya mu mbusangalufu yo afwīle bo umwēne ali mūmi. Ugwe kuyoba ugwe uli nu Būmi, lōli ugwe ufwīle. Ugwe kwīyobéla,” lyāyobīle i Bāngeli, “ukuti ugwe uli nu Būmi, lōli ugwe ufwīle. Ugwe kuyoba ugwe uli nkābi kangi ukuya nu kufūmbwa kwa nakimo; lōli ukumanya mma ukuti ugwe gwēmpelakisa, kangi ndōndo, kangi gwāngelebune, kangi mfwamaso, kangi utikumanya ikyēne.” Kangi ako ko kayīlo ka fipānga ikilo iki, Ntwa. Mūmo ifyēne fikipōndwa ifindu ifikulumba, ifyantengo ifi.

Ukumanya ukuti unkulumba Yehova Kyāla, Yūyo abagīle itolo ukutwāla mu. . . Umwēne āyobīle, “Ndwālīla Une utuswi utunini tula.” Umwēne alinkwēga iswi ukuti—ukuti atēndéke ikindukimo nu twēne. Ukunāngísya, ukuti ubusyūke bwābagīle ukuya kindukimo, ukubōmba ikindukimo nabo. Umwēne akāpelīle iswi syēne mma, lōli Umwēne āpelīle iswi imbīyāno, kangi u nkati umpīyāno. Kangi Umwēne ālyēsīsyē maelfu mahano nu tuswi utunini tuhano. . . utumomosela utunini nu swi ibili. O Ntwa, ikyene kyāli maboko Gake, kangi Umwene āli yo Mpele. Loli Umwene abagīle ukuya nakyo ikindukimo mu kiboko Kyake.

Kyāla, uswe tuli ibīkága twībēne mmaboko Gāke, ikilo iki, nukuyoba, “O Kyāla, nyēga une mu une njīlīle. Kangi akabalilo kāko ubumalikisyo bwa būmi bwāngu buli apa, unko une mbuke nu lusūbīlo ulu lūlo luli nkati mwa une, mmenye ukuti une mbāpígwe kāngi, kangi u Mbepo Gwāko abīkīle ubukēti na une, nukubīkīla ubukēti nu mbepo gwāngu, ukuti une na mwanundumiana Gwāko, pamo umwanundīndwána Gwāko.” Kangi ku lisiku ilyabumalikisyo lila, Ugwe kwisakusyusyága abene mmwanya. Pàga ikyene, Tata.

¹⁸⁰ Kangi akabalilo kāko uswe tuli ni mitu gyītu ginamisígwe, ngimba pabagile ukuyapo yumo abagīle ukufyūsya ikiboko kyāko, yoba, “Ngumbukilaga une, Nkundwe Branham, mu lwīpúto. Une ngulonda Kyala ukuti āmanyē une akabalilo kako. . . bo ngāli une ngasokapo pa kisu iki, ukuti Umwēne isakummanya une fiyo mwakuti Umwēne isakungōlēla ingamu yāngu. Une nisa kwāmula.” U Ntwa akusaye ugwe. Kyala akusaye ugwe, kangi ugwe; kangi ugwe, nkikulu. Umunduyumo

uyungi? Fyusya itolo ikiboko kyako. Yoba, “Ngumbukilaga une, Nkundwe Branham.” Ikyo kyo iki uswe tukubombága. Kyala akusaye ugwe, nkikulu. Ikyo kyo kinunu.

¹⁸¹ Lilino, akabalilo kâko untu gwâko gwĩnamisígwe, kwĩpúta, une nguyaga pakwĩmba ilinandi lwa lwĩmbo ulu:

Ukunyonywa mma ifyuma ifyaitolo ifya kĩsu
iki,

Ifi nakalinga fiyo fikubola,
Yēnga isũbĩlo syinu pa findu Fyasyēpwa,
Ifyēne fitisakumalikamo siku!

Umilila ku kiboko kya Kyala ikisitakwānduka!
Umilila ku kiboko kya Kyala ikisitakwānduka!
Yēnga isũbĩlo syinu pa findu Fyasyēpwa,
Umilila ku kiboko kya Kyala ikisitakwānduka!

¹⁸² Akabalilo kâko umwēne ikukina lilino, kangi untu gwâko gwĩnamisígwe, ngimba ugwe itolo kufikilága ikiboko kyâko mmwanya, yoba, “Ena, Ntwa, apa kilipo ikyāngu?” Ngimba ikyēne kisakubomba fiki? Ikyēne kisakanāngisya imbepo yâko, mwa ugwe, yibõmbile ulusalò. “Une ngulonda ikiboko Kyako, Ntwa.” Kyala akusaye ugwe, ndindwāna nnini. “Une ngufyusyága ikiboko kyangu.” Kyala akusaye ugwe, undindwana unnini, pāsi apa. Ikyo kyo kinunu, luuki. Kyala, ugwe umenye, asangalwĩke ukukubona ugwe kubõmba ikyo. “Bĩtikisyága abāna banini ukwĩsa kwa Une.”

¹⁸³ “Une ngulõnda, Kyāla, Ugwe ukukõla ikiboko kyāngu. Kangi pa lisiku lila, une ngulõnda ukuya nkiboko Kyāko; ukuti, akabalilo kâko Ugwe kukõlèla, une ngwisakwĩsága.” Ena, bo yu Lazaro. Kyala akusaye ugwe, kalumbu.

Bo injila yāngu yimalike,
Linga kwa Kyala ugwe gwāli gwabwanaloli,
Akēlu kangu akamulike akāya kâko mu
Lwĩmĩko,

Umoyo gwâko unyākilígwe gwisakukēta.

Ngimba ugwe kubombaga fiki lilino, polelo?

Umilila ku kiboko kya Kyala ikisitakwānduka!
Umilila ku kiboko kya Kyala ikisitakwānduka!
Yēnga isũbĩlo syinu pa findu Fyasyēpwa,
Umilila ku kiboko kya Kyala ikisitakwānduka!

¹⁸⁴ Tāta Gwakumwanya, amaboko mĩngipo gālĩnusígwe mmwanya, nkalukomano akanini aka, ikilo iki, ukuti abēne bikulõnda ukukolelèla, ikilo iki, ku kiboko Kyāko ikisitakwānduka, ikiboko Kyasyēpwa. Tumeenye ukuti iki kibikígwe kwa Ugwe. . . Ugwe gwāyobĩle, “Une. . . Bosa aba Tata ambele Une bisakwisaga kwa Une, kangi nayumo gwa bēne isakutāgigwága. Kangi une nisakubafyũsya abēne pa lisiku lyābumalikisyo. Bakabagĩla ukupyūtĩgwa, bakabagĩla ukwĩsa

ku bulōngi, lōli bali nu Bwasyēpwa, Būmi Bwasyēpwa.” Kangi bulipo itolo bumobwene u Būmi Bwasyēpwa. Ubo bukufumila kwa Kyāla, kwene. Ikyēne yo Kyāla. Kangi uswe tukuya kiyabo kya Kyāla, fiyofiyo nukuti uswe tuli banabalumiana na banabalīndwāna ba Kyāla. Akabalilo kako uswe tuli nu Mbepo gwa Kyala mwa uswe, uswe tukwinogonaga bo yu Kyala. Uswe tukwīnogona isya bugolofu nu bwīkēmo, kangi uswe tukugela ukuya nu bumi ukunsangalusya Umwēne.

¹⁸⁵ Pāga, Ntwa, ukuti uluko lula ulwa Būmi bwisakwīngīla mu mūndu aligwēsa uyu āfyusīsa ikiboko kyābo. Kangi bala bābo babagīle ukufyūsa amaboko gābo, kangi bakabōmbīle, une ngusuma ukuti Ugwe kwisakuyaga na bēne. Pāga ikyēne, Tāta. Kangi akabalilo kāko ubwēndo bumalike, u būmi bumalīke, abēne bali ingilāga mu lutēngāno pisiku lila, nu Mwēne, kūko uswe tutisakukāngalāmo siku, ukuyamo siku babine, ukuyamo siku ulutamio. Mpaka akabalilo kala, tukyungāga uswe basangalafu kangi bahobokeye, ukuntufya Umwēne, kabuno uswe tukusuma ikyēne mu Ngamu Yāke. Amenī.

¹⁸⁶ Mwesa umwe bitiki, lilino, unko uswe itolo tufyūsyē amaboko gītu nukwīmba ingobelo yila.

Umilila ku kiboko kya Kyala ikisitakwānduka!
Umilila ku kiboko kya Kyala ikisitakwānduka!
Yēnga isūbīlo syinu pa findu Fyasyēpwa,
Umilila ku kiboko kya Kyala ikisitakwānduka!

¹⁸⁷ Lilino unko uswe tung’ung’usyē ulwēne. Akabalilo kāko umwe mkubōmba ikyo, umpalamani gwīnu, ugwe yoba, “Kyāla akusayē ugwe, mpalamani.” Ponia amaboko nu munduyumo kifuki na ugwe. “Kyala akusayē ugwe.” Pa mbafu sibili-syōsa lilino. Pa mbafu sibilisyōsa, ponia ifiboko. “Kyāla akusayē ugwe, mpalamani. Kyāla ayēge na ugwe.” “Bika isūbīlo syako pa findu Fyasyēpwa.”

Doc, une mmenyē ikyēne kili pala, nkundwe. Une mmenyē ugwe gwālīko kula, Nkundwe Neville, iyolo fiyo.

Bo injila yāngu yimalike,
Kisakubonekaga, limo mwa masiku aga.
Linga kwa Kyala uswe twāli babwanaloli,
Uswe twisakumbonaga Nkundwe Seward Kula.
Akamulike kangi akamulike, akāya kāko mu
Lwimiko,
Umoyo gwāko unyakilīgwe gwisakukēta.
Umilila ku kiboko kya Kyala ikisitakwānduka!
Une nkuganile ukutufya uko, ukufuma pa ndumi.
Umilila ku kiboko kya Kyala ikisitakwānduka!
Yēnga isūbīlo syinu pa findu Fyasyēpwa,
Umilila ku kiboko kya Kyala ikisitakwānduka!

Akabalilo kīswīle nifyakwāndu ifyēngo,
 Nakimo ikya kīsi ikisitakugūtīgwa kisakwīma,
 Yēnga isūbīlo syinu pa findu Fyasyēpwa,
 Umilila . . .

Unko uswe tukōle ubukētelo bwa Umwēne, yula
 unsitakuboneka Yula pakati pitu lilino, kangi itolo
 ukummwīpūta Umwēne lilino bo uswe tukwīmba.

Umilila ku kiboko kya Kyala ikisitakwānduka!
 Umilila ku kiboko kya Kyala ikisitakwānduka!
 Yēnga isūbīlo syinu pa findu Fyasyēpwa,
 Umilila ku kiboko kya Kyala ikisitakwānduka!
 Lutengano! Lutengano! Lutengano
 lwakuswigisya,

Mpalaga itolo Umwene lilino.

Ukusuluka pāsi . . .

Indumi yimalike. Ulwene lo lutūfyi.

Pyāgilága pamwanya pa mbepo yītu
 kwabwīlanabwila, une ngusuma,
 Mmayiga amasitakupimigwa ga lugáno.

Itolo ukōga mwa Umwēne.

Lutengano! Lutengano! Lutengano
 lwakuswigisya,
 Kwisā pasi ukufuma . . .

Yila ingulumba i Nyībúko, Iyēne yikwīgúka mōsa.

. . . kumwanya;
 Pyāgilága pamwanya pa mbepo yītu
 kwabwīlanabwila, une ngusuma,
 Mmayiga amasitakupimigwa ga lugáno.

Ngimba ikyo itolo kitikubōmba ikindukimo?

. . . Lutengano lwakuswigisya,
 Lukusuluka ukufuma kwa Tata Mmwanya;
 Pyāgilága pamwanya pa mbepo yītu
 kwabwīlanabwila, une ngusuma,
 Mmayiga amasitakupimigwa ga lugáno.

Ngimba kikayapo ikindukimo ikya Ikyēne, itolo kikabi kangi
 kinyafu?

¹⁸⁸ Nguswīga linga alipo umūndu umbine ikulōnda ukupakīgwa
 nukwīputilīgwa. Linga alipo, itolo bwāga ubuyo bwāko.
 Uyu yo nkíkúlu nkikota kyamagudumu pala? Itolo unko
 umwēne asyāle. Une ngwīsa, ngummwīputíla umwēne. Umwēne
 atisakufimbilisígwa ukusumuka mmwanya ukufuma mu kikota.
 Uyungi?

O, ngimba umwe itolo mutikukigana ikiyabo iki ikya
 lukomano? Balinga bikwīpilika, itolo bikumanya ukuti u

Kuyapo kwa Kyāla kuli apa? Ikyo kyo iki une nguyoba. Ikyo kilakila... Ugwe kwīpilika itolo ngati... Balinga bikwīpilika ngati ugwe ubagīle itolo ukulata pānja? Lilino unko uswe itolo tukēte. Itolo kikipilikigwa ngati ikindukimo mwa ugwe kikulōnda ukulāta pānja. Muketile?

Iyene lo lutengano! Lutengano! Lutengano
 lwakuswigisya,
 Lukusuluka ukufuma kwa Tata Mmwanaya;
 Pyāgilāga pamwanaya pa mbepo yītu
 kwabwīlanabwila, une ngusuma,
 Mmayiga amasitakupimigwa ga lugāno.

Baka pa une,

¹⁸⁹ Akabalilo kāko uswe tuli mu mmapalo, uswe tukuyaga pakupaka ababine lilino, nukwīpūtila abēne. Ngimba ugwe utikwisaga kunokuno injila iyi, nkikulu?

¹⁹⁰ Ngimba iki kitikusanusya fiki? “Ulwiputo lwa lwitiko lwisakupoka ababine.” Aligwēsa mu lwīpūto lilino, itolo ng’ung’usya ulwīmbo lula. Inogona isya Yeso ikubumbulusya ababine.

Mōnelelāga umwēne mmafuta . . . ? . . .



BAHIBURI, UNTU GWĀKWĀNDA KYA57-0821
(Hebrews, Chapter One)

BŪKU GWA BĀHIBŪRI MBĀTIKĀNO

Ubulumbilili ubu butwaligwe nu Nkundwe William Marrion Branham, ubu pakwanda bwatwaligwe nki Ngereza pa Kitatu namayolo, Ogasiti 21, 1957, ku Branham Tabernacle mu Jeffersonville, Indiana, U.S.A., bwegigwe pa busimbe bwa tepi ya magneto kangi busimbigwe kisitakutumula mu ki Ngereza. Ukusimba ukwa mu Kyangonde ubu bwasanusigwe nu kuyabanisigwa na ba Voice of God Recordings.

KYANGONDE

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org